

Epist.

254

Crasmus



Ch. Wink. del.

Söckler. sc. 1779.

B. L. 5032,

B. L. lat. pag. 353.

Epist 257

EPISTOLAE FAMILIARES

DES. ERASMI

ROTTERDAMI

AD

BONIF. AMERBACHIVM,

I. V. D. ac Prof. Basil.

cum nonnullis aliis ad Erasmus
spectantibus.

*Omnia, testamento excepto, nunc primum edita ex
MSS. originalibus in Bibliotheca publica Acade-
miae Basiliensis servatis.*




BASILIAE.

Sumtibus CAR. AUG. SERINI, Bibliopolae.



MDCLXXIX.



ERASMI ROT
LECTORI SALVTEM.

Annos abhinc quinque venerabilis ecclesiae Basiliensis Antistes, *Emanuel Merian*, in conclavi S. Templi praeter alia complures epistolas ipsa *Des. Erasmi Rot.* manu exaratas, singulas ad *Bonifacium Amerbachium*, Iureconsultum Basiliensem, datas, bona fortuna inuenit, easque ab interitu vindictas ac eleganter compactas, Bibliothecae publicae Academiae Basiliensis inseruit. Cum autem non sine causa fuerit existimatum, harum epistolarum editionem erudito orbi haud ingrata esse futuram,

—

eam studiose curauimus, istisque
epistolis nonnulla alia ad Erasmus
spectantia, quae eadem Bibliotheca
academica suppeditauit, in com-
modum, vt quidem putamus, rei-
publicae litterariae partim praefixi-
mus, partim subiecimus: nempe:
diploma gradus Doctoris Theologiae
Erasmio collati; duas bullas pontifi-
cias eidem concessas, nec non testa-
mentum ab ipso compositum; quae
singula, si testamentum, rarius
quidem obuium, excipias, haec-
nus edita non fuerunt. Vale.

Basiliae d. 7. Oct. 1778.



DIPLOMA



I.

DIPLOMA

DE GRADU DOCTORIS THEOLOGIAE

DES. ERASMO ROT.

COLLATO.

Baldefar de Berneciis Dei et apostolice
 sedis gratia Archiepiscopus Laudicensis suf-
 fraganeusque et locumtenens ac vicarius
 generalis reuerendissimi in Christo patris
 et domini domini Johannis Ludouici Ru-
 uere eadem gratia episcopi Taurinensis et
 in hac parte alme vniuersitatis studii Tau-
 rinensis vicecancellarius ab eodem reue-
 rendissimo domino episcopo Taurinensi
 prefate vniuersitatis cancellario specialiter
 deputatus venerando viro domino Erasmo
 Roterodamo ordinis Sti Augustini conuen-
 tus vulgo dicti de Steyn in diocesi Tra-

A

iectensi in Hollandia, salutem in eo qui omnium est vera salus. Dignum et congruum arbitramur ut pro vniuersis iustis laboribus condigna meritorum premia tribuantur illis presertim viris qui difficilibus curis & laboribus infudarunt, et precipue sciencie sacre theologie per quam verum a falso discernitur et salus acquiritur animarum, cum itaque venerandus vir sacre theologie magister dominus Frater Iacobinus de Prato ordinis minorum vocatus tanquam vester promotor vos dominum Erasmus veluti sufficientem et in dicta sacre theologie facultate bachalarium bene meritum hodie coram nobis et venerando domino fratre Bernardino de Pirro sacre theologie magistro ordinis predicatorum dicte alme Vniuersitatis decano et aliis dominis doctoribus de collegio presentauerit. Nosque cum prefatis dominis decano ac aliis doctoribus dicti collegii presentationem huiusmodi de vobis factam solemniter duximus admittendam, et quia in eadem sacre theologie facultate idoneum vos reperimus ac sufficientem stantibus

—

responsionibus per vos datis argumentis et
questionibus vobis factis et prout a pre-
fatis dominis decano et ceteris patribus
doctoribus et magistris de dicto collegio in
premissis deputatis in ipsa facultate reper-
tus fuistis sufficiens et idoneus ad obti-
nendum licenciatus nec non doctoratus et
magisterii gradum in predicta sacre theo-
logie facultate, Nos igitur Baldefar Archi-
episcopus et vicecancellarius antedictus vo-
lentes premium virtutum & laborum ves-
trorum fructum quem possumus vobis
reddere gratiosum, vos tamquam dignum
sufficientem et bene meritum in prefata
sacre theologie facultate pronunciauimus
et pronunciamus harum serie publice li-
cenciatum auctoritate qua fungimur in hac
parte, vobis eadem auctoritate dantes et
concedentes auctoritatem et facultatem in
prefata sacre theologie facultate de cetero le-
gendi disputandi glosandi et interpretandi,
nec non doctoratus et magisterii gradum in
eadem sacre theologie facultate quandocun-
que volueritis petendi recipiendi et obti-
nendi in hac tamen Vniuersitate et sub vestro

iam dicto promotore, verum quia preno-
minatus dominus frater Iacobinus de Pra-
to promotor vester de mandato nostro nec
non de consilio et assensu predicti domini
decani et aliorum dominorum patrum et
dominorum de dicto collegio in aula epi-
scopali Taurinensi existencium in signum
gradus celsioris ac doctoratus et magisterii
in prefate sacre theologie facultate conse-
cuti cathedram magistralem vt moris est
assignauit, librum clausum pariter et aper-
tum traddidit Birretum capiti vestro im-
posuit, cum osculo pacis et benedictione
paterna in signum gradus et magisterii per
vos hodie benemeriti et obtenti, in quo-
rum testimonium presentes literas nostras
vim publici instrumenti in se continentes
per egregium episcopalem Taurinensem se-
cretarium subsignatum subscribi iussimus,
et sigilli prefati reuerendissimi domini can-
cellarii apensione communiri et vobis con-
cedi, Actas et datas in aula pallacii epi-
scopalis Taurinensis in qua similia fieri
consueuerunt die veneris quarta mensis
septembris anno a natiuitate Domini cur-

5

rente millesimo quingentesimo sexto, in-
dicatione nona, presentibus ibidem vene-
rando domino Iohanne Porcelli, capellano
nostro et nobili viro domino Michaële
Gaglardi dicte alme vniuersitatis bidello.
Testibus ad premissa vocatis et rogatis.

Pertachia.

(L. S.)

II.

EPISTOLAE FAMILIARES

D. ERASMI ROT.

ad

BONIF. AMERBACHIVM,

I. V. D. ac Prof. Basil.

Epist. I.

Augustus Furnio S. D.

Numquam tu desines rhetoricari. Itane
viues ac morieris ingratus, qui me tot
officiis oneraris, vt nullus asinus possit
esse onustior. Ego vero magno emtum

cuperem , si mihi contingeret talis hospes
mensas aliquot ; tantum abest , vt pro de-
lato hospitio postulem vllam gratiam. Gra-
tum est , quod locum indicaris. De Lasco
ob id volebam scire Beatum , ne miretur,
quod nihil scribat mittatue. Audio vos
denuo inuitari ad mensam Oecolampadia-
nam , Euangelicam hospitalitatem. Rogo
vt schedam his inclusam cures quampri-
mum per famulum tuum reddendam Hie-
ronymo Frobenio. Si tu prior praeftiteris,
quod ab illo peto , rem gratam feceris.
Bene vale cum tibi charissimis.

Epist. II.

S. Colloquium huius medici fuit mihi
magnopere iucundum. Videtur enim iu-
uenis singulari modestia bonoque iudicio
praeditus. Si veneris , erit pergratum ,
modo id fiat sine tuo incommodo. Moli-
mur hinc abitum , si qua detur. Sed
omnia coram. Si molestum non esset ,
cuperem videre clauas a Lutero tractatas ,
modo id fecerit latine. Bene vale. prid.
parasceues.

Cetera nosti.

Epist. III.

Erasmus Bonifacio suo S. D. Quod haecenus ad te non scripserim, non meae imputas inhumanitati, quae tua, mi Bonifaci, est humanitas, fat scio, sed laboribus prorsum immodicis, et tibi non omnino incognitis. Amo et te, et totum hoc Amerbachiorum nomen. De te summam spem concepi, ex tuis literis, vel Politianum, vel Zasium illum alterum Politianum referentibus. Perge gnauiter, qua coepisti, gratissimam patriam sanctissimis moribus, et optimis disciplinis illustrare. Nos hoc iam ad iter accincti scripsimus. Argutissimis Zasii mei litteris respondere non vacabat. Vbi dabitur otium, vel libris hominem prouocabo. Solus Germanorum mihi videtur loqui. Bene vale. Basileae.

Epist. IV.

S. p. Orta est hic nobis noua Comœdiola, quum haecenus Luscinus constanter et scripserit et dixerit, se institutum

fuisse a Ioanne Willingero et eius haeredibus in totam hanc domum, adeo ut illi non liceat cuiquam cedere ius suum, et ego, quum Tribunus ageret de locando, semper exceperim domum liberam, ne precium quidem pactionis receperim, nunc Vdalrichus Tribunus petit pretium pro quindecim mensibus retroactis, ostenditque litteras procuratoris Ioannis Leblin, Thesaurarii regis Ferdinandi, quibus admoneri iubeor, ut migrem ad festum Ioannis proximum. Ita bis debeo, Luscinio magnam gratiam, quod eius clementi permisso hactenus usus sim aliqua domus parte, Tribuno locatori triginta florenos, quum plus quam octo Coronatos antea dederim liberaliter absque pacto. Quum Glareanus diceret, non esse praelitam conditionem, quam exceperam, Trib. respondit: Potest agere cum Luscinio. Quasi ob aliud exceperim domum liberam, quam ut ne agerem cum Luscinio. Et Luscinus non semel praedicauit, se colloquutum cum Tribuno, eumque aliud ipsi dixisse, quam dixerat mihi. Rem scripsi

9

Tribuno, & addidi epistolam Luscinii manu scriptam, in qua ter vindicat sibi ius in hanc domum totam. Tribunus nondum respondit; cuius cuniculis haec agantur, nescio. Furiosus Eccius, imo terque quaterque rabiosus, multis nobilibus persuasit, Erasmus esse summum Haereticum. Caesar colligit ab omnibus Principibus Chirographa, qui velint adesse restituendae Ecclesiae. Videtur illud vereri, ne post excussos Monachos et sacerdotes tandem excutiantur et ipsi. Quid futurum sit, nescio. Ego aliò cogito, sed nondum statui, quò. Si tibi commodum esset exspatiari feriis paschalibus, confereamus quaedam, quae nolo litteris committere. Bene vale. Friburgi 8. Cal. Apriles.

Erasmus tuus.


Epist. V.

Quid ais, Bonifaci charissime? An me non sollicitum habeat melior animae meae pars? Quam inaeestimabilem thesaurum amitterem, si quid secus accideret!

Hic video omnes minime sollicitos, at ego non possum omnem curam ponere, dum haec exordia mecum reputo. Tua Pallas suggeret animo tuo, quod maxime erit in rem tuam. Hieronymus Frobenius habet in manibus pecuniae meae in auro 198. Coronatos folatos, et XI. Coronatos in testonibus, cum 40. Cruciatis. Opinor te nauigio peruenturum Neapolim. Reliquum iter tutum est. Gratum esset, si eam pecuniam tecum adferas. Nescio quid Hieronymo bellatori perferoci possit accidere. A quo officio si quid est cur abhorreas, malim tamen eam pecuniam vel apud te vel apud focerum tuum esse. Bene vale cum fratre Basilio et vxore. Quidquid a me praestari poterit, scito tibi paratissimum esse.

Gaudeo te nondum exisse. Nam hoc indicarat quidam agi. Scripsi Hieronymo de pecunia. Si verbo monueris, dabit.

Erasmus vere tuus.



Epist. VI.


S. Si fas esset hoc agere die festo, testamentum descriptum est. Si Notarius erit praesto, ceteros facile colligam. Ad horam secundam, aut mox post quartam. Non est properandum. Sed nunc utcunque valeo, quomodo valiturus sim, nescio. Vale.

Epist. VII.

S. p. De puero res nullius est momenti, nec erat locus de damno faciendae mentionis. Ille nihil petiit. Quod datum est, ultro meo iussu datum est, et recte datum est.

De Alcinoi Apologo diuinationo est, cui non est tutum fidere. Pro amica consolatione gratiam habeo, quamquam tu *ὑπὲρ θανάτου*. Mors Archiepiscopi *πρόφασις* *ἔστιν*, alia sunt quae pectus vrgeant.

Cogito de renouando testamento. Si is, quem prius haeredem institui, non abhorret ab onere, non mutabitur. Sic tracta-



bo rem , vt longe minus habeat negotiū ,
et plus commodi. Nam de excudendis
libris post fatum meum prorsus abiiciam.
Quid igitur ille habeat animi , scire cupio
per te. Bene vale cum omnibus tibi cha-
ris. 15. Januarii.

Erasmus Rot.

Epist. VIII.

S. p. Si legisti naenias Ecclesiastarum
Argentinenſium , velim annotes , vbi ma-
xime mentiuntur. Nam mihi pleraque
sunt ignota , praesertim quae gesta sunt
Tiguri , aut Bernae , aut apud S. Gallum.
Nam iste asseuerat , nihil vsquam factum
per tumultum. Respondi obiter , nisi quod
in codice meo finis abest , quod illi for-
tasse studio fecerunt , quod illic Nouima-
gus more scorpionum in cauda gestarit ve-
nenum. Non sum editurus , sed mittam
aliquot amicis in aulam , vt agnoscant ,
quales sint artifices. Nolim tamen istis
subolere , quod ipsorum naenias vel lectio-
ne sim dignatus. Augustae rumorem spar-

ferunt, eum librum tam male habuisse, ut in phrenesin versus perierim. Nec dubito, quin Epphendorpius per subornatos hoc sparserit. Scripsit Carlewicius, illum 20. dies ambisse colloquium cum Duce, nec datum responsum. Non dubito quin aliquid moliatur summo ingenio instructus a Nouimago. Caesar misit diploma satis instructum de condendo testamento, non obstantibus quibuscumque.

Epist. IX.

S. p. Nisi mihi perspecta esset tua singularis prudentia, monerem, ut temperares linguae tuae libertatem, si modo loqueris isthic, ut mihi scribis. Nondum apparet, quo res sit inclinatura. Nonnulla spes affulget non quidem pacis, sed excludendi belli. Eccius Augustae facinus se dignum designauit, de quo aliàs. Opto te cum tuis quam optime valere. Melchioris nomen pro Meltingero Quirinus meus supposuit, qui sapit quidem, sed non omnibus horis. Expecto quid placeat libel-

lus meus. Etiam atque etiam vale. Mitto exemplar litterarum rursus ad Alciatum, quod intelligam, superiores illi non fuisse redditas. Rogo cures ut accipiat.

Agnoscis tuum.

Epist. X.

S. p. Si parum probas consilium meum nihil miror; non enim electum est, sed adactum. Decreueram silentio deuorare ganeonis otiosi improbitatem; sed ille nullum facit finem, nec pudet quidquam. Ut primum venit Augustam, expetiit colloquium cum Duce Georgio. Dux per internuntium respondit, se deliberaturum; post multos dies rediit, idem postulans; Dux respondit, se dedisse negotium Simoni Pistorio, ut illum audiret, si quid haberet. Respondit Epphendorpius cum stomacho, sibi nihil esse negotii cum Pistorio, velle conuentum Ducem, apud quem esset falso delatus, moxque discessit indignabundus. Itaque quieuit, donec Pistorius et Carlewicus ob negotia redirent in pa-

triam. Cum rursus instaret, Dux dedit negotium Iulio Pflug, ut audiret querelam Epph. Huic, quoniam totam causam ignorabat, expleuit ambas aures vanissimis fabulis, adeo ut Dux veluti studiosus meae quietis scripserit, ut Iulii litteris haberem fidem. Scripsit ipse Iulius epistolam eruditam et amicam, sed quae testetur, ipsum ab Epph. nihil audisse nisi mera mendacia. Misit simul exemplar praefationis a me promissae, addens, si eam agnoscerem, Duci videri consultum, ut dicato libello redimam mihi otium. Dux petiit, ut quamprimum responderem, quum ipse iam pararet abitum. Nam Cochleius vetuit, ne ad ipsum mitterem Augustam, quod post triduum crederet abiturum Principem. Respondi per praefectum Brisacensem, necdum habeo responsum. Haec data opera artifex procuravit sub abitum Principum, ne spatium esset respondendi. Insinuavit se in familiaritatem quorundam meorum, expiscaturus, si quid de ipso. Vidit litteras, quas scripseram Ioanni Fabro. Vidit quas

Henkello, tametsi in his nihil de Epphen-
dorio. Nec dubito, quin idem fecerit
apud alios multos. Primo illius aduentu
sparsus erat rumor, me sic offensum libro
Argentiniensium, ut inciderim in phrene-
sim, et ea perierim; nec dubito, quin id
illius arte sit sparsum. Post apud multos
praedicavit, me Basileae coram magistratu
flexis genibus ab ipso petisse veniam. Hunc
itaque libellum curavi excudendum, in
quo tamen nullo verbo laeditur Epph.
Sed post cognitam veritatem intelligent,
qui illum audierunt, aut illius legerunt lit-
teras, quanta sit hominis vanitas. Bene
vale. Friburgi. Prid. vigiliae Simonis et
Iudae.

Epist. XI.

S. p. Vereor, mi Bonifaci, ne ista quae
narras, quamlibet τραγικά, nihil aliud
quam praeludia sint τραγικοτέρων. Et vndique
sefe ostendunt eiusmodi tumultuum mi-
nae, ut nesciam, quid tibi consulere de-
beam. Pontifex quid non persuasurus est
Caesari

Caesari post beatissimorum pedum oscula?
Nec difficile est diuinare, quos spiritus
cum suis habeat ille sanctissimus. Apud
Brabantos plane regnant πτωχοτύραννοι, clam
fremente populo. In Anglia res sunt tur-
batissimae, non solum ob Cardinalem de-
iectum, verum etiam ob dissidium Regis
et Reginae. Cardinalis Campegius reli-
quit Angliam, nullo alio responso edito,
quam: Res magna est, amplius deliberan-
dum censeo; quum in hoc esset accitus,
vt negotium expediret. Atqui ne dicere-
tur nihil egisse, satis magnam auri vim
extulerat Caletium, sed intercepta est prae-
da, non dubito quin conniunte Rege.
Sed hanc Iliadem ex Dilso cognosces. Co-
mes Palatinus, suppetias ferente Lantgra-
uio Hessiae, velitatur aduersus Cardina-
lem Moguntinensem. Quin et Turcam
hic metuimus irritatum. Interim Caesar
indulget osculis et pompis Italicis, non
sine maximis impendiis. Rubra crux rur-
sus erecta est apud Brabantos aduersus
Turcam. Monachi pingunt Turcicae cru-
delit. exempla, ac vociferantur strenue.

sed nemo dat obolum. Nos hic in oppidulo nec tuto, et vndique cincto hostibus, quos non paucos habet etiam intus, velut inter sacrum et saxum sedemus, omnia Deo committentes. Tu tuum ipsius animum inprimis confules, an expediat vel nunc solum vertere. Opinor, non male cessurum, quod foci consilio susceperis. Multi demirabantur, in tali rerum statu isthic residere; ego certe mirabar, salariolum et istorum pollicita tantum apud te valuisse. Harum aedium domina nupfit marito, qui nec emtorem vult, nec conductorem. Dicitur huc breui commigraturus. Mihi demigrandum erit. Brabanticae Tragoediae Catastrophen audire malo, quam spectare. Interdum cogito Patauium, sed negant, in Italiam vlli iter esse tutum, ob rusticos insidiantes militibus a Venetis dimissis.

Vellem te cogitare de negotio Regis Angliae, non quod illi me velim admiscere, quod Cardinalis Campegius non est ausus. Probabile est, ingentem caedem orituram

in Anglia, nisi exstiterit certus heros. Contra durum est, Reginam, quae illi tot annos conuixit, toties abortiit, tandem filiam elegantissimam dedit, repudiari; et tamen ex hacce negant esse spem prolis, medicorum vt opinor iudicio.

Quod duxit a fratre relictam, non repugnat iuri diuino, et intercessit Pontificis diploma. At Rex apud populum testatus est, se numquam habuisse rem cum illa animo maritali. Illud verum est, adhuc sub tutoribus agens vehementer reluctatus est, ne duceret hanc vxorem. Sed quum a tutoribus varius iniiceretur metus, etiam ne regno excuteretur, et excussus, vt ibi mos est, occideretur, duxit, sed vt satis indicaret, se non ex animo ducere. Quod si abstinuisset ab illa, et amoto metu declarasset animum suum mature, tale quidam esset, quale fecit Lodouicus 12. Rex Galliarum. Quidam consulunt, vt filia nubat alicui magnati, ex eo coniugio natus succedat in regnum. Sed praeterquam, quod incertum est, an ea res exclusura

fit seditionem, obstat illud quoque, quod Rex apud populum professus est, se numquam cum ea congressum animo coniugis, quae vox illam facit notham. Tantum superest, an res, etiam si fuit verum coniugium, sit dispensabilis, ob publicam tranquillitatem. Si paras migrationem, quo maturius id feceris, hoc meo iudicio feceris tutius. Bene vale, amice incomparabilis. Friburgi. 17. Cal. Febr. vxori et fratri f. p.

Erasmus Rot. tuus.

Mitto libellum de remediis sudatoriae pestis. Apud Brabantos subinde incendunt aliquot, quo simul et haereses purgent et aërem. Nam eo suffitu putant repurgari coelum.

Epist. XII.

S. Quid scripseris superioribus mensibus, non memini, nisi ceu per somnum. Illud certe gaudeo, patriam agnoscere, quem habeat thesaurum, teque sic a diuersis ciuitatibus ambiri, quamquam, vt

tuum ingenium habeo perspectum, non relinques patriam. Tua tamen Minerva tibi suggeret felix consilium. Ego precabor, ut quidquid decreueris, tibi tuisque bene vertat. Quid oneris habeat συνδινία, nescio, aut quid adferat salarii. Tuo genio conuenit munus, quod amplo censu quam minimum habeat molestiarum. Mature statues, nam pendere miserum est.

Hieronimus tibi dedit verba. Scripseram illi, me Sabbato ante dies octo coepisse respirare, nimirum coelo mitiore, sed nocte consequuta turbinem obortum mihi reuocasse totum malum. Nunc tri-duo commodius habeo, sed non ausim mihi placere, quando vna nox subito renouat omnem Tragoediam.

Rogo significes, quid debeam Pharmacopolae. Opus est frequenter opera amicorum, pecunia nondum est opus. Si non pateris me soluere, fiet, ut non ausim tibi quidquam posthac committere.

Defunt mihi calami scriptorii. Si tibi

superest vnus aut alter , mitte ; habeo duos ex tuo dono , sed nimium graciles.

Quod meus es , ac meus esse cupis , Vir egregie , isthuc , mihi crede , facis mutuum. Ego Bonifacium amicum in magna felicitatis parte duco. Vale cum tibi charissimis. Basilio germano salutem plurimam. 8. die Februarii.

Erasmus Rot. tuus.

Epist. XIII.

S. p. Nos hic iam dudum licitamur aedes boni nominis , sed iniqui pretii. Hodie aut ero dominus , aut nunquam. Eas tibi licitor , magis quam mihi. Si quem putas fore , qui petat Sadoletum , fac significes. Simulque fac sciam , quam dextro Mercurio causam egeris tuam. Bene vale cum tibi charissimis. Friburgi. 6. Cal. Julias.

Agnoscis tuum.



Epist. XIV.

S. p. Vide domum foceri tui; nam fumarium absolui potest intra biduum duntaxat, quod ad vsum attinet. Nihil statuas certo, nisi te huc reuerso. Si maneo apud focerum, curabitur ne quid habeat ex me molestiae. Prandebo cum meis, et nihil non faciam meo sumtu. Bene vale.

Epist. XV.

Huic fasciculo obducito tunicam, obsignato funiculo, sed ita ne quid perfores ob syngraphas inclusas. Intus adde tantum haec verba: Faceres mihi rem valde gratam, si curaris quod his litteris petitur, quas his inclusimus. Reliqua lege solus; Nam non expedit alium quemquam esse conscium.

Epist. XVI.

S. p. Iacobus Sadoletus in suis ad me litteris queritur, raras abs te meque venire litteras. Ait se legisse omnia, quae Pius

in me scripsit. Oro, ut si detur oportunitas, cures meam epistolam ad illum perferendam, simul mittas, si poteris, libellos quorum altero respondi Pio, altero Theologicae facultati. Ego venabor occasionem, eosdem ad illum mittendi, si qua forte ad illum perveniant. Id enim ille petit suis litteris. Vereor ne Caesar moveat nobis aliquid novae tragoediae. Bene vale. 4. Cal. Martias.

Epist. XVII.

S. p. Me multis iam diebus rumpit sceleratissima tussis, nec potest desinere. Ut leuissimum illum Turbunum magnus perdat Iupiter, qui me in has turbas coniecit. Ipse decubuit calculo usque ad extremum vitae periculum, sed reuiuiscit.

Pro faxis fumarii petit octodecim libras basilienses. At ego audiui illum Theologo dicentem: Non magno constabunt, quatuor aut quinque florenis. Magister artium.

Si huc esses transmigraturus, non foret

incommodum quod offero. Sed eius rei non video magnam spem; quare consilium aliud quaeretur, si tu repudias, quod proximis obtuli litteris.

Iucundum erit, si cognouero, te cum tibi charis recte valere. Basilio salutem plurimam.

Epist. XVIII.

S. p. Si quid nactus es de Alcinoi apologo, quaeso ut per hunc significes. Aut si quid aliud est, quod me scire voles. Nam hoc prouerbum semoui a reliquis. Bene vale cum omnibus tibi charis. Prid. Epiphaniarum.

Eraſmus Rot. tuus.

Epist. XIX.

Oro ut prima quaque occasione hanc epistolam mittas Sadoletto. Te ipsum expecto, quod ut erit gratum, ita nolim tuo incommodo fieri. Vale. 27. die Aprilis.

Agnoscis tuum.

Epist. XX.

S. Reuixisse te magnopere gaudeo. Si quid meus Iacobus isthic effutiuit temulentus, aut designauit quod me referat scire, poteris per hunc tuto scribere. Est enim mihi spectata hominis fides. Bene vale.

Epist. XXI.

S. Priusquam sumamus operam in scribendo, vellem explorare te, num tribunus velit hoc negotium tua causa recipere, et an sit illic diutius commoraturus; dein an Iacobus Sturmius absit in aliqua legatione. Syngrapha mea habet de auro in auro; tanto minus erit farcinae huc apportanti. Remitte exemplar epistolae ad Copum, ac vale.

Epist. XXII.

S. Ipse vix femiuius, ex animo doleo calamitatem domus soceri; hanc domum puta esse tuam. Vbi commodum erit, lubens tecum quaedam communicauero coram. Bene vale.

Epist. XXIII.

S. De declamatione per Caluum reddita nihil omnino memini, nisi forte sentit epistolam liberius scriptam. Excutiam tamen schedas meas, et si quid tale comperero, faciam quod iubet. Ante complures menses accepi ab eo epistolam non tam prolixam, quam amicam et elegantem, vna cum Sucqueti litteris. An postea scripserit nescio. Bene vale.

Agnoscis.

Tua ilico curavi, sed nihil responsi ad me allatum est, et properat auriga. Vale.

Epist. XXIV.

S. Non est animus ad tam stulta convicia quidquam respondere. Aut ego nihil iudico, aut homo simpliciter insanit. Iunxit copias suas Epph. et illi instillavit in aurem aliquid arcani. Nam fuit olim congerro meus. Nam et Epph. minitatur atrocem librum. Hoc tamen nugamentum contra edictum Senatus Argentinensis fur-

tim excusum est, nec loci, nec typographi prodito vocabulo. Reliquerunt locum, diem et annum epistolae scriptae, ut lector existimet hic excusum. Hae sunt technae veteres Epphendorpianae. Sic lusit in libello Othonis. Inueniet aliquando Deus τὸν παμμίαρον. Me corripuit nescio quae valetudo ex aëris siccitate; nullis remediis possum recludere aluum. Bene vale, mi Bonifaci. Si quid voles in aulam Caesaris, hic meus Liuinus eo properat, vereor ne minus feliciter; fortassis et Thraasonis libellus furtim est alicubi. Subodorato. De Budaeo scribam alias. Rursum vale.

Epist. XXV.

S. Superest orare superos, ut omnia vertant in bonum exitum. Regem tali Labyrintho inuolutum doleo. Si hic calculus excantari possit è vesica, caetera fortiter ferrem. Bene vale cum tuis omnibus.

Erasmus tuus.



Epist. XXVI.

S. p. Adest equidem Epphendorp. dira
spirans ac iudicium minitans. Renano vi-
detur consultum, vt cras in aedes Beri
veniamus ad colloquium, experturi, num
res verbis inter nos transigi queat sine tra-
goedia. Optarim te adesse, si commode
possis. Nam mihi litigandi nec vsus est,
nec ocium. Bene vale. Noctu delibera.

Epist. XXVII.

Constat, Erasmus plus praestitisse,
quam exigebat arbitrium.

1. Primum praescripsit, vt scriberet Duci;
hoc erat vltra pactum.
2. Praescripsit, quae deberet admiscere;
et hoc vltra pactum.
3. Exegit vesp. vt mane essent paratae lit-
terae; et hoc vltra pactum.
4. Vt ab ipso lectae, ipso praesente, sig-
narentur; et hoc vltra pactum.
5. Vt ipsi traderentur mittendae; et hoc.

6. Exegit praefationem libri nondum nati. Et hoc.
7. Nec Erasmus promisit inscriptionem, nisi amicitiae nomine. Et ita si sensisset Epiphendorpius, ex animo factum amico. An hoc praestiterit, nescio. Certe ipse in litteris fatetur, se effuisse de multis nostris libris &c. Et epistola, quam iactat, habet conui- cium perfidiae.
8. Vt nihil horum constet, non licuisse. Etiam si fuisset praescriptus dies, quod omnes norunt, qui me norunt.
9. Ante proximas nundinas nihil possum illi polliceri. Solus superest libellus Chrysostomi graecus, qui nec illi conuenit, et ante sesquiannum promissi Cartusiano cuidam optime de me merito. Hunc dicabo si velit, quamquam non obligor.
10. Sententia: Petit quod fieri non potest, quodque non debetur ex arbitrio. Si quid interim molitur inimice, faciet contra fidem compromissi.

Numerant dies profectionis ad nundinas. At iam oportebat librum esse paratum, si esset excudendus.

Epist. XXVIII.

Si recte vales cum tuis, est quod plurimum gaudeo. Nos, gratia superis, utcumque valemus. Si quis obtinget, per quem scribas Alciato, quaeso ut eidem committas has litteras ad Petrum Castellanium, qui agit apud Biturigas. Cura ut quam optime valeas cum tibi charissimis. Non est quod haec res te sollicitum habeat; non est magni momenti.

Epist. XXIX.

S. p. Rogo ut quum primum licuerit, mittas nobis libellum Luteri de bello aduersus Turcas. Ioannes a Lasco excusat se de silentio, quod me noluerit inuidia grauari. Nam inuolutus est negotio fratris cum Turca bellantis aduersus Ferdinandum. Iustus Regis Secretarius scripsit, illum esse factum Episcopum in Vngaria,

et eo iam profectum esse, nescire tamen,
vbi resideat. Doleo vicem hominis. Id
eo scribo, vt per te sciat Beatus. Tam-
etsi fatius arbitror, non spargi rem latius.
Bene vale. Media nocte. Saluta mihi Ba-
siliū de nota meliore cum vxore.

Agnoscis tuum.

Epist. XXX.

S. p. Quid hoc saeculo miserabilius? aut
etiam iniquius? Spero, fortunam tuae
prudentiae tuaeque integritati resposu-
ram. Etiam gratias agis? Non potes esse
tui dissimilis. Nondum videris agnoscere
animum meum. Gratum est, quod nun-
cias focerum nondum redisse. Demiror
tamen moram tam diutinam. Suspicio il-
lum aliquid agere in aula Caesaris, alio
praetextu. Cupio te cum tuis omnibus
quam optime valere.

His obsignatis accepi alteras litteras tuas
parum laetas. Sed tu fac sis animo phi-
losophico, et homo natus casus humanos
moderate ferto.

Epist.

Epist. XXXI.

Age, patiar hic quoque te vincere, quando ita vis; sed posthac non dabo tibi similem occasionem. Dissimulandum erat, quod mihi pararetur ille pulvis. Extrudunt suas materias euanidas. Quod in hoc pulvere praecipuum est, rebarbarum, ni fallor, putre est. Quem Ephorinus curavit, erat elegans. Medicus erat.

Gratum est missos esse calamos. Raeto egi gratias, cui curabis reddendam epistolam.

Gaudeo tibi auctam fortunam cum dignitate. Cupio te cum tibi charissimis quam prosperrime valere. Friburgi. 21. die Febr.

Erasmus Rot. tuus.

Epist. XXXII.

Hunc ludum mihi semper praesagiit animus, ac vehementer mihi soceri consilium. Vtinam me fallat augurium minitans atrociora. Vehementer cupio scire,

quo in statu res tuae sint. Nam hic parum laeta nunciauit. Mihi pulchre conuenit cum hoc coelo, sed admodum displicent haec rerum prooemia. Dominus tueatur innocentes. Bene vale, Vir animo meo charissime, cum fratre optimo. Datum Friburgi. 17. Cal. Iulias.

Agnoscis tuum.

Epist. XXXIII.

S. Ioachimus medicus spem nobis fecit tui aduentus. Nos quasi de Calcaria in Carbonarium, ab apophthegmatibus ad prouerbia reuoluti sumus. Si tibi fertilissimas iureconsultorum fegetes spatianti forte occurrerit aliquid, quod existimabis nobis fore vsui, quaeso vt communices solito tuo candore. Bene vale.

Epist. XXXIV.

S. Habeo gratiam. Si quid nouorum accesserit, indica. Quis tibi dixit, canem in eadem tegula dormientem esse prouerbium? Decepit te. *φασί*. Multa iam exi-

erant manus meas. Multa iam antea prodideram. Bene vale.

Eraſmus Rot.

ſi forte manum non agnoſcis.

Epist. XXXV.

S. p. Libellum glorioſi Sepuluedae iam bis acceperam, primum e Lutetia illic excuſum, mox e Roma, vbi primum excuſus eſt. Sunt mnerae naeniae, nec video eſſe dignum vlllo reſponſo. Alia magis vrgent. Iniecta erat ſpes aduentus tui, ſed ea fefellit. Si omnia ſunt ex animi ſententia, vehementer gaudeo. Vale cum tibi chariſſimis. Frib. poſtridie Euchariftias.

Hodie venit ad me meus Cacabus, dicens, illum cui iuſſeras committi litteras ad Alciatum, nuſquam inueniri in rerum natura. Admiratus, quid eſſet, iuſſi exhiberi tuum epistolium ad Cacabum. Pro Bernardo legerant Burcardo, et pro Melin Meliti. Iuſſi vt adiret Secretarium Sena-

tus, et quaereret Bernardum Melin, et inuentus est. Sed nae tu vir prudens es, qui stipiti committas quidquam. Bernhardus ille non mutauit institutum, sed ait se expectare Antonium Bletzium, venturum opinor ad Calendas graecas. Haec adieci contante Albano Medico. Vale etiam atque etiam, φιλότατη κεφαλή. .2.

Epist. XXXVI.

S. p. Perplacet Syngrapha. Alteram exuram. Non dissuaserim illi amico nostro, ut accipiat oblatam conditionem, si modo respondeat ὁ μισθός. Nam mihi videtur nimium familiaris Sireni blandissimae ἀπραξία. Itaque expediet illum ad negotia pertrahi, ut excutiat illam desidiam. Res est in sinu, nec discingor. Vale. 4. die Febr.

Erasmus Rot. tuus.

Epist. XXXVII.

S. p. Litteras tuas priores pistor meus mihi reddidit, nec interim obtigit, per

quem scriberem. Tu nihil inuita dices faciesue Minerua. Tuus animus tibi fuerit consultor optimus. Nisi abhorreret ab aula, egregius gradus fuerit Dolae profiteri. Et tamen illic non absque digladiatione profitereris, quum, ni fallor, genius tuus aequè abhorreat a concertationibus atque ab aulis. Animal es domesticum ac cicur. Nec temere feliciter cedit *θεομυχέιν*.

Libertas ista an diu sit duratura, nescio. Vereor, ne profecto Caesare redeant ad relictà, vel dissimulata potius. Sed futura praescire, Dei est. Quare vt fruaris fumo *τῆς πατρίδος γαίης*, excogitandus est tibi color, quo Dolensibus satisfacias. Excusabas conditionem ignotam. Ea iam delata non omnino maligna, aliquid noui comminiscendum est, quam ob rem quod offertur non accipias.

Vt delicatus puer a mamma matris possis abesse, tamen vxor cum liberis, & soceri affectus non leues sunt remorae. Qua-

re quod factururus es , fac certa animi destinatione. Nam pendere miserum est. Bene vale. 20. die Aprilis. Basilio salutem plurimam.

Epist. XXXVIII.

S. p. Vt video , magnificentius de te sensi , quam pro re. Non dubitabam , quin domi haberes tria millia florenorum. Certe dignus es centum millibus. Si iniquitas temporum aliaeue causae obstant , quo minus existimes tibi commodum accipere quod offero , non ero tibi posthac molestus. De oculata die non est quod labores. Satis est , si prima solutione dentur ducenti floreni pro vno tantummodo , tertio centum. Hic si quid est commodi , in nullum transferre malim , quam in te tuosque ; Sin aliud obstat , non ero posthac molestus. Nihil tamen agam cum alio , ni prius acceptis tuis litteris. Nec est quod mihi gratias agas. Arbitror omnia mea tua esse. Opto te cum tuis quam optime valere. Saluta mihi Grynaeum

amanter, et Basilium. Friburgi. 25. die
Ian.

Epist. XXXIX.

S. p. Nec conuictorum nec quaestus sum
avidus; tamen quoniam video sic affec-
tum Danielelem moribus humanissimis, re-
cipiam illum ad mensam duntaxat. Nam
domi non est locus cubiculis. D. Polo-
nus gaudet illum accessurum. Non pos-
sum minus accipere quam florenos tres
in singulos menses. Vellem illum dicere,
quod daret 3. et dimid. Tantum enim
dat Polonus. Aut certe ne exprimat
summam, sed dicat se daturum, quan-
tum ego petiero.

Si habet tuus hortus Basilicam & Thy-
mum, optarem paullulum. Redde Da-
nieli suam epistolam et libellum. Vtrum-
que perlegi non indiligenter. Bene vale.

Epist. XL.

S. p. Scripsi ante paucos dies per homi-
nem certum. Per hunc a nobis conduc-

tum poteris significare , si quid velis.

Hic multi aegrotant , quidam etiam moriuntur , et in Anglia quidam amici excusant morbum. Nam illinc aliquot epistolas accepi de rebus meis certa nunciantes. Morus adhuc est in turri , sed mitius habetur. Nam Rex permittit , vt vxor et liberi ad eum accedant. Rossensis est in loco angusto , nec habet praeter vnum famulum.


De pensionibus alter negat se debere , alter soluit dimidium , quod bona ipsius fuerint a Rege confiscata. Bene vale, 18. die Febr.

Erasmus Rot. tuus.

Epist. XLI.

S. Legi arcana tua , sed imprudens. Omnino credidissem epistolam mihi scriptam esse , nisi fecisset mentionem pharmaci. Bene vale. 15. die Maii.

Agnoscis tuum.



41

Epist. XLII.

S. Quoniam mihi feliciter solent cedere, quae per te ago, mitto nunc epistolam ad Sadoletum, cuius exemplar iterum missurus sum per alium. Potes addere vnum librum Basilii de Spiritu sancto a me versum, et vnum declarationum novarum.

Mitto tibi dono volumen epistolarum palaeoneon, quarum prima tecum litigat.

Qui has reddit Ioachimus Gandauus, iuuenis est vtriusque litteraturae ac rei medicae pulchre callens. Bene vale. 27. Augusti.

Petit Italiam, si quid per illum voles scribere. Ibit opinor per Augustam.

Epist. XLIII.

Heruagius iam bis ad me scripsit, quasi totum Ciceronem ad me receperim. Et hoc honoris mihi defert, vt solus in eum praefarer autorem. Existimabam te susce-

piſſe hoc negotii. Mihi certum eſt aeſtate proxima ab hoc laborum genere feriari. Si forte naſtus eris qui petat Sadoletum, mitte illi homilias a me verſas et Symbolum. Bene vale. 8. die Martii.

Epist. XLIV.

S. p. Incommode accidit iuuenis meus huc die Martis ad vesperam, dum paullo iam reſſiſſet Trubbelmanus, Zafius epistolam tuam poſtremam miſit ſub noctem. Itaque non potui reſpondere. Cupio enim optimo viro in maioribus rebus gratificari. Vellem autem vt ad hoc exemplar fiat et mihi pyxis eiufdem pulueris. Mittam pecuniam primo quoque tempore. Vale. Die lunae. mane.

Epist. XLV.

S. p. Gratulor Ciceroni, qui tuis auſpiciis prodibit in lucem. Sed vide, ne te non poſſis explicare a piſtrino, ſi ſemel eo te conieceris.

Diuisio nihil habet difficultatis. Primus ordo est artis. Secundus operis, hoc est orationum. Tertius epistolarum. Quartus Philosophiae.

Editioni Cratandricae vidi quaedam adiecta ex Budaicis et meis citationibus. Aldus multa deprauauit. Vnum nominatim indico in prouerbio: Boui clitellas. In Adagiis, quae nunc adiecimus Chiliadibus, plurima loca cito ex M. Tullio. Si quid occurret per otium, admonebo.

Gallus ille tuus homo leuissimus, rogatus a me, quantum accepisset a Sado-
leto, fassus est accepisse se quatuor capita, hoc est Coronam, et Quirino dixerat duos. Exhibuit exemplar epistolae Sadoleticae. Epistolam aiebat interceptam ab eo, a quo fuerat captus et tortus: non ob aliud nisi quod suspicaretur, illum esse Luteranum. Et tamen ad Pharelli preces dimissus est; Odoratus ingenium hominis, dedi potum et octo plappardas. O iacturam inquis. Imo bene collocatum est,

qui tantillo liberatus sim a tali artifice.
Mundus impletur talibus planetis.

Hoc coelum incommode me tractat.
Tu cura ut cum tuis quam rectissime va-
leas. Nam instat Martius.

Erasmus Rot. mea manu.

Epist. XLVI.

Profecto doleo, Virum optimum tam
tristi casu ereptum esse. Sancte mortuum
esse nihil miror, nam qui potuit aliter,
qui tam innocenter vixerat? Hoc Basilio
nostro contigit, quod ego saepius optavi
in his atrocissimis cruciatibus, qui me
non videntur relicturi, donec opprefferint.
Praecessit nos Botzemus, candidus ami-
cus. Et hic Abbas quidam illius hospes,
mihi bene volens. Supremae voluntati
parendum est.

Epistolam Sadoleti multo amantissime
scriptam accepi vna cum libro, de quo
quid Theologi sensuri sint nescio. Si scri-
bes homini, rogo admisceas amicam meae

erga illum voluntatis testificationem. Nam mihi scribere per valetudinem tutum non est. Tu fac in omnibus humanis casibus tuam Palladem adhibeas in consilium. Vale.

Etiam atque etiam te rogo, ut propter veterem amicitiam, quae tibi tuisque fuit cum domo Frobeniana, adsis Erasmo. Vereor enim, ne apud quosdam plus valeat lucri ratio quam pietatis. In eo solo superest Ioannes Frobenius, quem quidam conantur reddere mancipium gentis, quum potius deberet esse caput. Friburgi. 16. die Aprilis.

Erasmus Rot.

Epist. XLVII.

Hic iacet, ante diem fati praereptus iniquis,

Gentis Amerbachiae gloria prima,
Bruno.

Non tulit vxori superesse maritus amatae,
Turtur ut ereptae commoriens fociae.

Hunc nudaē lugent Charites, Musaeque
trilingues,

Iunctaque } cum niuea simplicitate
Canaque } fides.

Epist. XLVIII.

S. p. Nihil opus erat spargi de aduentu
meo, qui prorsus incertus est, et scis,
quam in huiusmodi negotiis soleam *σπεύδειν*
βραδέως. Accepi litteras tuas, quae mihi
fuere gratissimae. Et illi Viro tam con-
stanter tamque sinceriter amanti gratiam
habeo maximam. Bene vale. 25. die Ian.

Erasmus tuus.

Epist. XLIX.

S. p. Arbitror iuuenem phrysiū tibi
reddidisse meas litteras. Quod mones de
Alciato, iam olim factum est. Indicat hoc
illius epistola, quam ad te mitto. Non
memini quidquam de declamatione, et sus-
picor, Alciatum falli memoria, aut eum
cui commisit, non reddidisse. Excussis

omnibus schedis meis nihil tale comperio. Hic multa nouantur nescio quo euasura. Opus est serio consultare. Sed haec coram, si fieri possit. Sin minus, mittemus certum. Quid mihi gratias agis de oblato hospitio? quasi non magni beneficii loco ducturus sim, si dignareris ad complures dies domi meae facere quidquid velles. Ni te vnice amarem, succenserem, quod apud Glareanum cubare malueris. Sed humanum est, famula nostra iam rancida est. Bene vale. 3. Cal. April.

Saluta regalem illum.

Erasmus Rot. tuus.

Epist. L.

S. Reges nolunt torqueri incommoditate scripturae, et mihi non est amanuensis. Cardinali scripsi manu mea. Si veneris post prandium, dabo exemplar epistolae. Vale.



Epist. LI.

Salve. Pultificum optime. Inhumanissimus sim, nisi iste animus mihi sit gratissimus. Inhumanus tamen sim, si te patiar in hoc officii genere diutius operam et impensam ludere. Nullo pultis genere delector. Vale. Hoc pro Lambarto respondeo. Nam illi non vacabat rescribere.

Er. Rot. tuus.

Epist. LII.

S. Vt omnia tibi laetissima opto, mi Bonifaci! ita isthuc eunti nescio quid mihi mali praesagiit animus. Sed Deo, hoc est animo tuo, et amoris in Alciatum, repugnare non sum ausus. Nihil est vita prius; Praestat periculose redire, quam isthic perire. Totus orbis videtur ad insignem quamdam mutationem vergere, quae si succedat, fortasse Iura vertentur in iniurias. Ante omnia, mi Bonifaci! cura ut viuas et valeas. Nam umbrae nec Achilli placuerunt. Nos coepimus corpore reualescere;

cere ; sed alia multa angunt animum ; sed omnium maxime rumor , huc per Cartesianos transcriptus , quod Petrus Aegidius esset captus vt Lutheranus. Et ecce famulus adfert litteras , nihil esse dictum sinistri. At interim alterum miseramus. O regnum *μονομαχικόν* ! O te felicem ! Hic mirus est tumultus ob Euangelium ; Sed hoc coram. Tu tantum cura , vt te videamus. Vides orbis tumultum. D. Alciato eris meo nomine epistola , cui tantum tribuo , quantum alii nemini. Haec scripsi a coena , ne nihil scriberem , mi Bonifaci. Commenda me Basilio , qui post abitum tuum numquam nos visit. Basileae. Natali Iohannis Baptistae. Anno 1522.

Erasmus ille vere tuus.

Epist. LIII.

S. p. Multo felicius cessit haec profectiuncula , quam putaram. Non solum enim non offendit , sed firmiorem etiam reddidit valetudinem. Vnde coniicio , et

D

prolixius iter profuturum. Vtinam contingat rerum tranquillitas ! Placet haec ciuitas bene morata, non audio quemquam de quoquam male loqui. Basileae semper bene volam, cuius hospitio tot annos sat commodo sum usus, et cui vicissim, ni fallor, hospes fui non admodum incommodus. Oblitus sum soluere pro me meisque in diuersorio, homo simpliciter impudens, deinde pro viatico et equo tuo. Adeo mihi excideram sollicitudine componendae domus. Quamquam aliis innumeris nominibus tibi debemus, mi Bonifaci ; Diminuendum erit aliquando aes alienum. Ancillae scrinium nondum aduectum est. Sunt in eo tres metae Saccharis, quas emi sex florenis et amplius ; quid sit in mora, demiror. Olfacito, quid isthic agat meus Carcinus, et quoties nactus eris hominem certum, scribe, si quid isthic extiterit, quod mea referet non ignorari. Nos vicissim curabimus, ne nescias, si quid hic orietur noui. Bene vale cum vxore, et Basilio βασιλικῶς. Friburgi. 7. Cal. Maias. an. 1529.

Erasmus Rot. tuus.

Epist. LIV.

S. Accepi scrinium tandem, ac tuam epistolam omni saccharo magis sacchaream, mi Bonifaci. In praesentia nihil aliud vacabat rescribere, nam properabat auriga. Hic habito corpore, apud te animo. Bene vale cum tuis omnibus, amice incomparabilis. Heri scripsi Hieronymo Frobenio. Friburgi. 3. Non. Maias. 1529.

Non opus est subdere nomen.

Epist. LV.

S. Accepi litteras ex Biturigia 9. Cal. Sept. scriptas, in quibus erant omnia laeta de Alciato. Si cessit, nuper cefferit oportet. Doleo fortunam hominis virtutibus parum respondere. Ista Enyo num patietur me de te ponere sollicitudinem? De litteris ad Castellatum ne sis anxius, minimi momenti, et misi alterum exemplar Francfordiam. Confido tuam providentiam prospecturam, ne quid res tuae detrimenti capiant. Nos, gratia superis, sat

recte valemus hactenus. Adrepsit in Germaniam pestis Britannica, quo malo non aliud formidabilius. Domini sumus, ille de nobis, quae volet, faciat. Bene vale, Bonifaci amicorum sincerissime, cum tibi charis omnibus. Frib. 5. Cal. Oct. 1529.

Erasmus Rot. tuus.

Epist. LVI.

S. p. Dii boni! quod habemus Evangelium, non modo falax et edax, verum etiam pugnax ac lucrax. Non dubito quin arte Conradi sit factum, ne Budaei nouum opus ad nos veniret. Facile credo, Budaeum in me non stringere calamus, sed eruditionis causa cupiebam videre. Nunc opera Conradi expectandum erit Pascha. Budaeus ut vir magnificus non dignatur attingere plebeios, sed quemadmodum in me subornauit versificatorculos, quorum vnus est Iacobus Tuffanus, ita in Alciatum, cui et ipsi male vult, subornat iureconsultos nescio quos. Fabulae partem cognosces ex epistola Vig-

lii , summae spei iuuenis. Si lues Britannica demigrauit in Germaniam , nihil eo malo formidabilius , nec celerioris contagii. Apud Britannos ante annos ferme quadraginta exortum , numquam desiit , licet subinde saeuit acrius. Vix credas esse tantum hominum in Anglia , quantum occidit , quum adhuc ignota esset vis morbi. Sudor est igneus , intra octo horas , aut paullo plures , tollit hominem , aut vitae spem porrigit. Qui caloris impatientia admittunt auram , subito praefocantur ; qui occlusis omnibus multo igni cubiculum incendunt , praefocantur ; si motis linteis contingat ventulus , actum est de illis , praesertim si aperiant axillas , quas ipse morbus sic astringit , vt , si velint , aperire non possint. Itaque lintea sudore putria sensim subducuntur non mota lodice , ac paullatim inferuntur munda excluso vento. Hac moderatione factum est , vt postea multo pauciores perirent. Quin repetit iterum atque iterum hominem noua contagio. Aiunt denique reperi-
tum a medicis praefens remedium , quod

cuiusmodi sit, nondum scire potui. Puto apud Anglos vix trigesimum quemque ab eo malo praeteritum. In familia Mori frequente nullum reliquit intactum, praeter ipsum et vxorem, nullum tamen sustulit, quod sciam. Quot flagellis admonet nos Deus, nec tamen emendamur. Si quando voles commutatione loci reficere animum ad dies decem aut quatuordecim, habebis apud nos cubiculum et lectum satis commodum, mihiq; futurus es hospes multo gratissimus. Apparaui mihi nidum meo sumtu sat commodum. Si modo nancisci liceat bonorum lignorum copiam, caritatem vtcumque contemno. Nec est quod de sumtu cogites. Ingens lucrum mihi fecisse videbor, si liceat tua doctissima consuetudine vti frui. Saluta mihi Basilium et vxorem. Ipse vt quam optime valeas opto. Datum Friburgi. 4. Nonas Octobr. 1529.

Agnoscis tuum.



Epist. LVII.

S. Vtinam non coniecero nos in falsum gaudium Hieronymus Frobenius, qui nobis spem praebuit tui ad nos reditus. Est abunde spatium in his aedibus. Erasmius nostrum dimisimus; Id adeo me inuito factum non est, ut iam pridem hoc procurauerimus, licet incerto puero: Verum audi fucum. Semper suasi, ut proficisceretur Louanium, neque prorsus abduceretur a litteris, donec plane pubuisset, quamquam iam nunc pubuit. Locus est elegans, Academia frequens, multae lectiones publicae, et quidem gratis. Adest illic Carolus Harstus domi alens aliquot honestos adolescentes; habet uxorem aptissimam his curis, quibus interdum opus habent pueri. Ipse conuictus nobilium, atque adeo principum puerorum nonnihil contulissent ad componendos Erasmi mores; tum omnes professores in aere meo sunt, nihil non facturi mea. His rationibus arbitrabar posse fieri, ut liberali consuetudine, hilarique bonorum conuictu,

elueret odium taediumque studiorum ,
quod ex illis tot carnificibus a teneris im-
bibit ; qua de re coram audies prodigiosa
quaedam. Verum hoc consilium num-
quam illis placuit , quod mihi tamen non
debet admodum esse molestum , quum vs-
que adeo non sit nouum , vt quoties de
institutione pueri ageretur , cuiusuis con-
siliū sequerentur potius quam meum.
Decreuerant illum mittere Lugdunum , vt
in taberna Melchioris periret frigore , for-
didoque et longo seruitio fieret , vt num-
quam erigeret animos. His rebus ita pen-
dentibus , venit huc Hieronymus abduc-
turus Erasmus. Seductum rogavi , quid
esset decretum. Ait , totum mutatum
consilium ; decretum , vt iret Lutetiam ,
nec adhuc a studiis in totum abduceretur.
Admiscuit autem quaedam , quibus indi-
cabat , forte Erasmus adhuc Basileae hy-
bernaturum. Id tamen si dissuadebam mul-
tis argumentis , tamen aliis intentus non
fatis animaduerti fucum ; Eum nocturna
patefecit cogitatio. Audio , Oecolampa-
dium habere commercium cum ea fami-

lia. Occasionem dedit Chrysoſtomus. Ei communicarunt conſultationem de puero. Is conſilium dedit, vt maneret Baſileae ſub diſciplina Cyrenaei. Cum oderint literas, tantum ſpargunt fumos profeſſionum, partim quaestus gratia, partim vt aetatem ſimplicem in haereſi ſua confirment; et me ſuſpectum habent, quod ſoleam amicos ab huiuſmodi addictionibus auertere ſedulo. Mane iam conduxerant equum Eraſmio. Expoſui Hieronymo, quid ſuſpicarer; et inter multa hoc adieci, mihi videri hoc conſilium eſſe peſſimum, ſed tamen habere me rationem, qua id ferrem moderatius. Roganti quam tandem, vt exuam, inquam, affectum, quem hactenus habui in Ioannem Frobenium, cui hactenus ne mors quidem viri quidquam detraxit. Non dubito, quin iſthic adſit Georgius, qui mouet hanc machinam; Metuit, ne puer euadat parum haeretici; quumque puer ſimplici natus ingenio, et ad omnem nutum cuiuſlibet plus ſatis obſequens, tot annis a tot carnificibus excruciatuſ ſit, vſque ad integrae mentis

iacturam, nunc rursus hoc agunt, ut fae-
uitia, quod superest mentis, obtundant,
ac perpetuo puerum faciant. Ni fallor,
peregīt annum 16. et Hieronymus subin-
de asseuerat, illum nondum egressum an-
num 14. Iam non nouum est, si cuculi
ouum alieno nido suppositum exclusit no-
bis pullum *quē* *τοῦς γυναικίους* deuoret. Nec
mirum est, si pro nihilo ducit filium,
qui patrem semper habuerit pro ludibrio.
Sed de his latius coram si venies; quod
ut quamprimum tuoque commodo facias
opto. Interim hoc opellae mihi praestes
rogo, ut dissimulanter olfacias, quid agant
de Erasmo, et quid moliatur Georgius,
opinor et Carinum adesse. Postremo fabu-
lare cum puero, et expiscare, ecquid sibi
gratuletur de relicto Friburgo, quoque
sit in nos animo. Nec enim videtur ha-
bere tantum ingenii, ut agnoscat discri-
men inter bene meritum et male meritum.
Etsi haberet decem patres, non tractarent
illum amantius, quam a nobis tractatus
est. Nihil illo Hieronymo fucatus, qui
cum prius patrem impie contemserit,

coniuratus cum tali vxore , nunc eam con-
iecit in tale matrimonium. Supereſt per-
dendus Eraſmius. Haec liberius in ſinum
tuum , qui noſti , quae dicenda , quae ta-
cenda. Si differs aduentum tuum , et ha-
bebis certum hominem , per quem ſcri-
bas , ſignifica nonnihil de myſteriis. Be-
ne vale. Friburgi. prid. Non. Nouembr.
1529. Non relegi.

Eraſmi tui manum agnoſcis.

Nefcio quis caſtiget Budaearia. Quae-
dam deprehendi errata , ni fallor. Col. 1.
verſ. 12. κατηγόρος ſcribendum arbitror.
Col. 13. verſ. ab initio 6. βουλὴ puto ſcri-
bendum. Col. 18. verſ. 16. ἐκεῖνος male ha-
bet. Col. 19. verſ. ab initio XI. pro εἰκους
οἰκους ſcribendum. Si videtur mone Be-
belium.

Epift. LVIII.

S. Non obſtabam , quo minus iret Lu-
tetiam , licet maluiſſem puerum ire Lo-
uanium ; tantum haerere Baſileae , et au-
gere ſcholam Euangelicam , et in Herua-

gii carnificinam retrahi nolebam. Quod abductus est, id meo consilio fuisse procuratum, verissimum est; sed miror, unde id resciverit puer; nam ipse iusseram esse clam. Iudicio dimisi, affectu receperam. Amabam illum amore patris, sperabam nostro conuictu futurum, ut amaret studia; puer id valde cupiebat, nec tamen eram admissurus, nisi me flexisset misericordia. Viuebat apud priorem solus discipulus, vapulabat affatim; erat minister mensae, nam habebat conuictores sex, famulum nullum. Ille seruus erat culinae, et totius domus hydrophorus. Nec dimissurus eram illum, si Nicolaus tractasset illum ex animi mei sententia. Nicolaus est prae fracti ingenii, et ni illius fensiculis obsecundauerit, intolerabilis. Illud demiror, quod puer ex quo discessit, nec scripsit, ut receperat, nec in alienis litteris, imo ne verbis quidem me saluare iussit. Si pudor est, aut negligentia puerilis, condonandum est, sin ingratitude, vereor, ne et affectum meum et officium parum bene collocarim, ac pro-

pemodum me poenitet, quod Goclenium
tam accurata commendatione onerarim.
Non est, cur huc vlllo tuo incommodo
venias. Tantum volebam tua consuetu-
dine frui, si id tibi bonum atque com-
modum fuisset. Vbi veneris, habemus
paratum cubiculum, et stabulum sat com-
modum, sed absque pabulo. Perge κατὰ-
σκευασιν agere, quamquam arbitror, illos
iam esse profectos. Animi gratia lubet sci-
re, num ante profectionem vapulauerit ab
Heruagio, qui demirabor, si potuit ab-
stinere manus. Gallia est afflicta, Italia
funditus perdita, Hungariam obtinet
Turca, et vereor ne haec tempestas per-
uadat totum orbem, idque breui. Curis
domesticis angi te doleo, quibus et ipse
non raro discrucior. Sed ad omnia du-
randus est animus. Bene vale, morta-
lium charissime. Friburgi. Octaua Marti-
ni. 1529.

Agnoscis tuum,



Epist. LIX.

S. p. Tuus sum et tuus esse gaudeo. Nihil ista cantione mihi dulcius. Tametsi nihil opus occinere, quod penitius infixum est animo, quam ut vmquam possit elabi. Nec arbitror necesse, ut tibi recinam: Tuus sum et tuus esse gaudeo. Meditor respondere Sadoletto et Alciato. Si quis obtigerit, admone. Hic nihil est nouae rei, nisi quod pestilentia se remisit, et isthic ut audio pullulat. Opto te cum tuis omnibus quam optime valere. Nominatim saluta mihi Basilium. Friburgi. 8. Febr. 1530.

Epist. LX.

S. p. Nicolaus Episcopus iniecit mihi nescio quid scrupuli, quum narraret, te isthic manere iustum ad dies octo, alioqui huc adornantem iter. Deinde dixit nescio quid de litteris interceptis per quemdam huic venationi intentum. Spero recte fore omnia; sed utinam me fallat mea diuination, qua semper metui, ne parum

felix esset tibi Resp. cum cuius moderato-
ribus esset tibi de Religione dissidium. In
tali statu non est anxie rei familiaris ha-
benda ratio. Et neglectum emolumentum
honestæ de causâ sæpe cum foenore pen-
sat Deus. Noui tuæ indolis ingenuita-
tem, nec ignoro quorundam maleficas
insidias, quibus ante omnia fidunt. Ne-
scio an tibi scripserim de Thrasone no-
stro, qui scribit ad me, se coactum sum-
fisse calamum, ac nostro libello respon-
disse, sed tamen moderatius, quam postu-
labat rei atrocitas. Pessime habet homi-
nem, quod ibi fiat mentio decem flore-
norum. Ad hoc ita respondet: Quis tibi
dixit, me petiisse decem florenos? Dic
illi, eum esse sceleratissimum furciferum,
et nefandissimum sycophantam. Videtur
oblitus, quid tibi Beatoque dixerit. Dissi-
mulo me accepisse epistolam. Quid agas
cum tali portento? Sed huius generis ni-
mis multa alit Germania. Si huc vene-
ris, domus hæc gaudebit tali hospite.
Habemus iam lectos. Opto te cum tuis
omnibus quam rectissime valere. Saluta

Basilium meis verbis amanter. Friburgi.
nono Cal. Mart. 1530.

Erasmus omni iure tuus.

Epist. LXI.

Videtur in fatis esse tuis, ut difficillimae legationes tuis humeris obtrudantur, tametsi solent eximiis ducibus laboriosissimae prouinciae delegari: ac earum quidem difficultas animi virtute superatur; caeterum istius animi vim aduersa corporis valetudine impediri, magnopere dolendum est. Mihi tertium iam mensem cum tenacissimo malo res est, adeo ut nec scribere possim, nec dictare, nec attentius auscultare recitantem, indies magis ac magis exarescente corpusculo. Ita visum est Domino. Hodie tamen ferro ruptum apostema praebet aliquam salutis spem. Nulla res me coëgit Basileam relinquere, nisi palam profligata vetus religio, et res subinde illic nouae. Nam officina Frobeniana propemodum ex me pendebat, et qui mihi ob dogmatum dissensionem male volebant,

volebant, tamen vel ob hoc cupiebant me illic manere, ne discessu meo conflarem ipsis inuidiam, velut odio sectae profugiens. Idque tum Oecolampadius tum Tribunus plebis, qui totius illius negotii Coryphaeus est, mecum egit accurate, ne meo recessu ciuitatem grauarem inuidia. Tandem venabantur ansum, quocumque pacto retinendi mei; sed nullam inuenerunt. Nulli eram vlllo nomine obnoxius. Nec clam me subduxi, sed meridie a ponte loco frequentissimo solui, diu cum amicis ibi confabulatus. Is recessus me non admodum discruciat. A tali republica libenter profugi. Doleo tamen, ciuitatem et celebrem et elegantem, cuius hospitio tam diu fueram vsus, in hunc rerum statum deductam esse. Sed vtinam hanc solam liceret deplorare! Migratio mihi damnosa fuit, sed valetudini profuit. Quomodo me sit excepturus orbis, nescio. Iampridem circumspicio sedem aliquam tranquillam, vbi quietus ac mecum viuens expectem diem supremum. Sed nondum obtigit. Hoc corpusculum mul-

tis eget, praesertim vino generoso. At non ubiuis suppetunt omnia. Nec tamen defunt, qui mihi male velint in vtrisque castris. Qui sese dogmatibus improbatis addixerunt, neminem peius oderunt, quam me, in quibus nullos patior hostes infestiores, quam quibuscum olim mihi fuit arctissima consuetudo. Sunt rursus ex altera parte morosi quidam praecipue monachi, qui me velim nolim contendunt facere Lutheranum. Itaque vtrinque profcindor linguis, lapidor petulantissimis libellis. Verum a damnatis vituperari mihi propemodum laudi duco. Monachorum naenias facile negligo; Ridentur a cordatis omnibus. Illud demiror, quae res permoueat Albertum Pium, olim Corporum principem, ut in me stringat calammum. Iam Lutetiae libellum vnum euulgavit, cui respondimus ciuilitate. Nunc, ut significant amicorum litterae, molitur aliud volumen, et, quod mirum est, abutitur ad haec stipendiatis aliquot, praesertim Sepulveda quodam Hispano. Argumenti summa est, me fuisse occasio-

nem, auctorem ac principem totius huius prodigiosae tragoediae. Loca colligit, quae videntur cum Luteri dogmatibus conuenire, quum ne vna quidem sententia sit cum Lutero consentiens, si absit calumnia. Quasi sit obscuro, vnde malum hoc primum extiterit. Quanto fuerit labor utilior, si colligat e libris meis loca, quae pugnant cum Luteri dogmatibus, quorum infinitus est numerus. Sed si haec sunt fati mei, bonorum iudiciis, et recti conscientia me ipsum consolabor. Interdum cogito Italiam, sed pudet senem peregrinari. Arrisit enim coelum Patauinum, delectauit Italicae gentis humanitas. A Brabantia mea vt multa alliciunt, ita multa deterrent; in quibus est ipsum coelum, cuius an hoc corpusculum iam patiens futurum sit, nescio; tum aula Caesaris, quam si colo, actum sit de hoc corpusculo, si negligo, non possum illic subsistere, et videbor contemptu facere, quod coactus necessitate facio. Verum super hac re, si valetudo contingat prosperior, deliberabitur. Postremo, quod petit T. R.

D. vt significem, quid in praesenti rei-
publicae statu sperem metuamue, video
viros me longe perspicaciores, quibusque
Germaniae res tum publicae tum priuatae
penitus cognitae sunt, quam mihi, qui hic
plane peregrinor. Nullum dispicere pos-
sum huius monstruosissimae tragoediae exi-
tum, nisi Deus veluti de machina subito
apparens vertat animos hominum, quod
utinam nobis per Caesaris potentiam ac
pietatem largiri dignetur ipsius misericor-
dia. Haec vnica mihi spes est. Alioqui
quoties animum conuerto ad humana con-
silia praesidiaue, nihil omnino video spei.
Immo, quo diligentius contemplor huius
mali partes omnes, hoc magis mihi in-
horrescit animus, demiranti quid hoc por-
tentoso tumultu parturiat mundus. Opta-
bile erat, si pestis haec citra sanguinem
ac mortes sanari posset, et spes esset, si
se remitteret factionum pertinacia. Quod
si ferro res geratur, vereor ne conspicia-
mus miserandam Germaniae faciem, vt
ne commemorem incertum esse belli euen-
tum, maxime quum tam late sparsum sit

malum, vt vsturis aut sectionibus velle mederi, sit totum pene corpus perdere. Proinde, si e rebus pessimis eligendum sit aliquid, fortasse consultius sit, res in hoc libramine relinquere, in quo nunc sunt, donec Deus nostri misertus suam adhibeat medelam. Qua in re illud persaepe miratus sum, quod quum tot fuerint in ciuitatibus tumultus, toties foras vtrique procursum sit ad arma, tamen haecenus guttula sanguinis non ceciderit, semperque haecenus seruata sit inter eos commerciorum ciuilis concordia. Multa sunt hulnera, querelae seruorum in dominos, non omnino vt ferunt iniustae, quod fuit primum rustici tumultus seminarium, cuius cineres metuo ne etiamnum viuant. Deinde plebis aduersus principes querimoniae, ad haec odium in Ecclesiasticos omnes, quod Lutheranis proprium non est, sed fere laicorum omnium commune. Atque huic inuidiae noster fastus, luxus, et palam impudica vita non minimam causam dedit, neque quemquam tamen videmus, qui tot malis admonitus se ver-

terit ad vitam emendatiorem. Iam apud Germanos etiam hi qui sectas detestantur, non sunt tamen admodum propensi in pontificii nominis fauorem, adeo ut, ni suprema potestas isthic adesset, fortassis expedierit non adesse legatum apostolicum. Accedit huc Turcarum rabies, quae quo progressura sit nescio. Non enim dubium est, quin metuat duorum fratrum indies crescentem potentiam. Quid nunc commemorem rerum omnium non modo caritatem summam sed penuriam? Denique, ut consentiant principum Germaniae voluntates, quomodo succedet bellum, quod maxima ex parte geretur inuito milite? Nam quemadmodum in ciuitatibus noua dogmata profitentibus sunt nonnulli catholici, ita in ciuitatibus catholicis permixti sunt plurimi diuersae mentis. Quodsi semel datum sit belli signum, tam perierit Erasmus, quam extrema quod aiunt faba. Nam hic locus minime tutus est. Malo tam multiplici, tam vndique exulcerato, non video quis mereri possit nisi Deus, cui in manu est re-


pente rerum humanarum scenam in diuersum vertere. Id autem fore, maior spes esset, si principes vtriusque status, caeterique omnes, consentientibus animis ad Christum oculos suos intenderent. Quod si ad suam quisque rem spectabit, ut hactenus factum est, precandum est, ut diuina bonitas hominum inconсульта consilia vertat in laetum exitum. Solus enim ille, qui sceleribus hominum offensus passus est hanc fatalem luem in Ecclesiam suam irruere, potest eam ubi velit tollere. Quid enim aliud, quam supremi Numinis iram interpretari possumus, quod per homines humiles et contemptos tam cito tam ingens facta est defectio? Impius de Eucharistia error quanta celeritate quam late diuagatus est? Iam infelices Anabaptistae quanta coecitate in mortem ruunt? Atque ita videtur affectus Germaniae populus, ut si quis exoriatur, qui dogma aliquod absurdius proferat, ilico sint amplexuri. Det Dominus, ut omnes concordibus animis ad Christum pastorem conuertamur; precorque, ut Christi Spiritus Caesaris ac

principum animos dirigat ad salutifera consilia. Libentius hinc emigrabimus, si conspexerimus tantam rerum tempestatem in tranquillitatem esse versam. Haec aegre diebus aliquot dictavi per afflictissimam valetudinem. Scripsi liberius fretus humanitate, cui vehementer commendatus esse cupio. Eam Dominus sospitet ac prospere in omnibus. Apud Friburgum Brisgoiae. Natali diui Iohannis. Anno 1530.

Epist. LXII.

S. p. Zasius conciliauit sibi nominis immortalitatem edito libello. Si quid me scire voles, aut Simon noster per hunc scribat. Sed ita pingit, ut non multo facilius legam illius scripta, quam dicta percipio. Amici aulici cogunt nos hic haerere, licet animo refragante. Caesar bonam hyemis partem videtur acturus in Germania. Utinam feliciter omnia. Bene vale. Friburgi. 5. Cal. Sept. 1530.

Agnoscis manum tui.



Epist. LXIII.

S. P. Vir Doctissime. Quod proximis meis litteris pollicitus eram, praestiti. Tuae igitur fuerit humanitatis boni consulere nostram opellam, qua neglectius propter occupationes nostras absolui quod petieras. De prudentia tua nihil dubitamus, qua curabis, ne vnquam mihi obsequium inscio Erasmo praestitum adferat poenitentiam. Sunt enim in ea epistola quaedam, quae fortassis nollet ab omnibus legi; quare magis mirabor, si eam impresam videro. Si quid praeterea fuerit, quod per nos fieri velis, impera et factum puta. Seruet te Christus incolumem. Friburgi. XI. Ianuarii. An. 1531.

E. T. deuotus

Quirinus Talefius.

Epist. LXIV.

S. p. De litteris nouissime ad Alciatum missis non satis memini; perquiram tamen. Hodie nonnihil remisit se febricula,

nec spero mihi futurum melius, nisi hoc sese mutet coelum incommodissimum. Augustensis Mercurius meus nondum rediit. Ex Anglia scribunt, Archiepiscopum Cantuariensem iterum atque iterum hoc anno egisse animam. Et est octogenarius. Debentur ex praeterito floreni aurei trecenti, in singulos annos ducenti. Si quid illi acciderit, Angli non dabunt pilum. Pensionarius Tornacensis scripsit ad me per Schetum, sed Euangelici litteras intercepte. Si coelum mutaret frontem, fortassis exspatiabor Neoburgum tentandi gratia. Ibi condetur testamentum. Etiamne gratias agis? Ut numquam non es tui similis! Etiamque plurimas? Ego te, mi Bonifaci, pro vnico amico habeo, quo thesauro nihil esse potest homini pretiosius. Bene vale. Vxori et Basilio salutem plurimam. Friburgi. XI. Cal. Maias. 1531.

Epist. LXV.

S. Cruciatus pedis, a quo malo metuebam, reliquit me, sed illi successit sto-

machi proluuium, absque stomachi ruina.
Id me et hodie tenet, sed spero finem.

Anselmus taedio nostrarum miseriarum
sefe ad felices contulit, cui propemodum
inuideo, adeo remoror hic lubenter.

Statueram inuisere νεόπολιν, sed consul-
tius arbitror expectare, donec sim firmius-
culus. Id erit, vt spero, breui. Ibi vel-
lem te adesse. Nam est quod tecum co-
ram commentari cupiam. Vale, et quid
agas scribe. 6. die Septembris. 1531.

Erasmus Rot. tuus.

Epist. LXVI.

S. p. Minimum abfuit, quin adierim
Neapolim. Canonicus, qui illic habet
aedes, obtulit equum, quadrigam tectam,
hospitium, quid non? Ille praecefferat
die Martis, nos quadriga eramus sequu-
turi die Mercurii. Pridie denunciatum
est nobis, vt essemus parati ad sextam.
Factum est. Mox denunciatum, aurigam
non abiturum ante octauam. Summus

ouum. Rursum denunciatur, non abiturum ante duodecimam. Iam miseram farcinulam. Relata est, famulis significantibus, illum eo die nusquam iturum. Sic ego fessus itineris, priusquam iter ingrederer, remansi domi, idque multis de causis. Incertus eram, an focer redisset, et si redisset, verebar, necubi esset in vineis. Postremo dubitabam, an essem gratus hospes futurus, veniens a loco pestilenti. Nam hic perierunt aliqui, et rumor solet atrocior esse re. Ne domi quidem deerat quod agerem. Adhuc mihi res est cum fabris. Adhuc peregrinor in propriis aedibus. Dices: Significaram redisse focerum, et te fore gratissimum hospitem. Scio, te significasse, tuo more officiose. Tamen ego nesciebam, quod significaras. Qui sic? inquires. Bobellius treis epistolas, inter quas erat tua, bene potus reliquerat in diuerforio, quod est inter Basileam et Friburgum. Eas ante biduum demum accepi. Cupio scire, num res tuae satis sint ex animi sententia. Nam rumor huc perfert parum gratas fabulas. Nos et a

cruciatu pedis et a stomachi proluvio sat
feliciter conualuimus, gratia Christo. Va-
le. Saluta Basilium. Frib. 17. die Sept.
1531.

Erasmus Rot. tuus.

Epist. LXVII.

S. p. Scripsi per Gasparem Velium. Si
quid me scire voles, per hunc scribito,
quem proprie conduxī. Expecto enim
laetum a Senatu responsum. Socer tuus
scripsit Bero, ad se diuertisse nescio quem
metu pestilentiae vna cum sua familia. Ex
hac vnum subito periisse. Hoc me nescire
noluit, ne si forte venissem, poeniteret
consilii. Abieceram iam eam cogitatio-
nem, sed tamen virum illum huius officii
nomine multo pluris facio quam antehac
feci. Bene vale. Frib. 13. Cal. Octob.
1531.

Erasmus Rot. tuus.



Epist. LXVIII.

S. p. Non est quod te macerent mea mala. Sic est fatum meum. Optarim tibi omnia laeta, et spero fore.

Aduentus tuus erit gratissimus, nolim tamen te properare tuo incommodo. Vide coelum. Et res non eget magna celeritate. Caue ne te focero misceas ante tempus. Apparet acrem esse pestilentiam, quae tam celeriter occidit. Et hi menses sunt omnium pessimi. Bene vale, amice incomparabilis, cum omnibus tibi charis. Friburgi. 11. die Octob. 1531.

Habemus locum et foenum, ne quid tibi sit rei cum diuersoriis.

Erasmus Rot. tuus.

Epist. LXIX.

S. p. Stomachus sat feliciter reuixit, et hactenus in his affectionibus tam commode se gessit natura, vt magis nec optare possim. Deest conuictor lepidus, et animus curis vacuus. Beda non conquiescet.

Sed quando incidimus in hoc furiosum Saeculum, ad omnia obfirmandus est animus. Vereor, ne scintilla belli istius gliscat in magnum incendium. Zuinglius habet iudicium suum apud homines, utinam inueniat mitius apud Deum.

Quandocumque venies, venies mihi gratissimus, modo id fiat tuo commodo. Verum eo admonui ne properares, ne, ut es sedulo officiosus, cum tuo aliquo incommodo huc te conferres. Ex Anselmi litteris intelligo, illum de repetendo nostro conuictu non cogitare. Recipiendus est igitur conuictor aliquis, qui solitudinis taedium subleuet. Haec domus te caperet cum tota familia. Nudius tertius Antonius Fuggerus misit hunc proprium nuncium, significans, et domum et sumaria esse parata. Offert omnes fortunas suas, si velim venire, idque miro affectu. Utinam talia scripsissent ante emtas has aedes. Reieci negocium ad primam hirundinem. Nec enim aliud potui. Urget hyems, et per totam Germaniam feruent vaporaria mihi inimica.

Non est quod tibi consulam, vir optime, habes Palladem domi, quae suggerat, quid sit factu optimum. Bene vale.
24. die Octob. 1531.

Erasmus Rot. tuus.

Epist. LXX.

S. Quid ais? persuasit tibi iureiurando Grynaeus? At emoriar, si vel minima suspicio de fide illius umquam attigit animum meum. Nec possum satis admirari, unde haec suspicio illi de me venerit in mentem, nisi quod hoc saeculum non patitur quidquam esse tranquillum. Puto iam illi exemptum scrupulum. Si quid resedit, tu eximito. Scaligeri virulentias accepi. Aleander est autor, tam agnosco phrasim hominis, quam noui faciem. Video, prorsus animo gladiatorio ad me affectant viam. Beda cum suis, Eccius, et Aleander Archiepiscopus nunc apud Caesarem Legatus, cum plenissima potestate, parique infania. Nunc existimat se perfecturum, quod ante annos octo frustra tentauit. Scalige-

Scaligerum se vocat, minitans incendium. Nihil est tam famosum, quod non excudatur Lutetiae, modo sit aduersus Erasmus. Non satis est illis occidere Erasmus, nisi totum extinguant, erepta etiam fama. Viderit Dominus. Negotium quod tecum agere volebam, nec est magni momenti, nec eget magna celeritate. Aduentus tuus erit gratissimus, modo ne tuo cum incommodo venias, gratior futurus, si aliquot hebdomadas voles hic commorari, praebebitur et stabulum equo. Bene vale. Prid. natalis Andreae. 1531.

Agnoscis tuum.

Epist. LXXI.

S. p. Si hic sedem aut haberes, aut habere destinasses, etiam de die oculata non nihil remitteremus. Nunc quando res ipsa dissuadet, non pergam esse molestus, dum conor esse officiosus.

Quid nouae rei sit allaturus Caesar, nescio. Mirum de illo silentium. Aliquid

monstri alitur. Per secretum consilium
nunc aguntur omnia.

Vtinam Grynaei felicissimum ingenium
mansisset integrum liberalibus studiis! Nam
audio, illum suffectum in demortui Oe-
colampadii vicem.

Nos adhuc tussimus, sed paulo mitius.
Expectandus est hyemis finis. Opto te
cum omnibus tibi charis quam optime
valere. Friburgi. Nono die Febr. 1532.

Erasmus Rot. tuus.

Epist. LXXII.

S. p. Nae tu ὑπερβολικῶς candidus es, Vir
egregie, qui quum omnia laeta magis cu-
pias esse amicorum quam tua, tamen si
quid acerbius accidit, celas amicos, quum
recte dictum sit et illud: κοινὰ τῶν φίλων ἄχνη.
Non dubito quin vehementer discruciet
animum tuum filiolae desiderium, quam
sic adamabas, sic in deliciis habebas. Sed
homo iure consultus, qui alios doces Cae-
sarum parere legibus, aequo animo parere

debes naturae legibus, quae ducunt volentem, nolentem trahunt. Quantumvis autem exaggeres hoc damnum, tamen negare non potes, esse reparabile, modo tu cum vxore sis incolumis. Quid si tibi pro filiola Deus reddat filiolum haeredem non tantum facultatum, verum etiam istius eruditionis eximiae, cum omni virtutum genere coniunctae? Neque enim necesse est, opinor, vt me admonitore discas, nihil esse diligendum immodice, ne dolor erepti succedat immodicus. Scis, quid optimo viro fratri tuo Brunoni acciderit. Quid quod Deus interdum ob hoc ipsum eripit nobis quod habemus, quod praeter modum amamus, et fingimus esse proprium ac perpetuum, quod est commodatitium ac temporarium. Dicas in rebus humanis et hic esse Nemeseim quamdam. Tuus morbus, de quo fero sum admonitus, me magnopere sollicitum habuit, nec eam sollicitudinem adhuc ex animo possum extundere, nisi tuis litteris factus fuero certior.

Post triduum mittam isthuc proprium famulum, per quem poteris tuo commodo quae voles scribere. Nuper misi litteras Sadoleti, nunc mitto tres fasciculos Epistolarum ex Italia, ni fallor, datos. Ad me peruenerunt ex Augusta Vindelicorum. Basilio, vxori ceterisque tibi charissimis salutem plurimam. Bene vale. Friburgi. 4. die Iulii 1532.

Erasmus Rot. tuus.


Epist. LXXIII.

S. p. Ex epistolis quas ad te nuper misi, puto te scire, quo in statu res sint Alciati. Pestis exigit illum rursus e Biturigia, et ambit conduci Patavium. Epistolam meam Sadoletus acceperat sine libris. Post scripsit et libros fuisse red-ditos.

Sollicitus expecto quomodo valeas; adeo metuo istam immodicam philostorgiam.

Per hunc famulum meum potes rescribere, si commodum est. Heruagius a me

discessit iratus. Ad te deferetur querimonia. Sed rem accipe. Praesente Episcopo egit mecum, ut praefarer in Demosthenem. Respondi, me in hoc nimium indulgisse typographis, posthac nolle prostituere nomen meum simili modo. Ille instabat. Pernegavi. Interim Episcopus petiit Epistolam ad Goclenium de Ammiano. Dum hanc scribo, Heruagius obturbat, oro te, oro te. Iussi illum valere, addens: Scis mentem meam; quid opus est pluribus verbis? Abiit. Nam comites illorum urgebant. Misi post famulum, qui mitigaret responsum, diceretque me de praefatione deliberaturum. Ibi stomachum suum effudit in sinum famuli; se huc venisse te autore, ut de multis mecum communicaret. At satis diu sumus confabulati, quum ille tantum de praefatione loqueretur, de qua numquam cogitaram. Nam de aliis quibusdam illi scripseram. Et si volebat mecum colloqui, non poteram simul et epistolam scribere, et cum illo confabulari. Quod si serio iratus est, facile feram, modo ne



posthac mihi obturbet. Bene vale cum
tibi charissimis. Frib. 8. die Iulii. 1532.

Agnoscis tuum.

Epist. LXXIV.

S. Rursum misi famulum meum, ut
certo gaudeam te conualuisse, adhuc enim
anxius & anceps sum animi. Τὸ ἐπισό-
λιον ἐνθάδε ἐγκεκλεισμένον διὰ τοῦ οἰκέτου
σου λάθρα πέμψεις τῷ ἱερονύμῳ Φροβενίῳ,
sed χωρὶς admonito, ὥς μόνος ἀναγινώσκη,
ἵνα μὴ ὁ οὗτος ἐμὸς παυμιαρὸς αἰσθαίνοιτο.
Bene vale. Postrid. Cal. Aug. 1532.

Epist. LXXV.

S. p. Admonueram Grynaeum proximis
litteris de quodam loco apud Platonem,
ipsum tamen excusans, quod editionem
Aldinam esset sequutus. Ille nihil ad id
respondit, sed misit Epistolam supercilio-
sam et acidam, in qua exprobrat mihi
decadem suam. Qui posset esse tam irri-
tabilis, si esset animo in me defaecato?

Semel atque iterum te autore deposui
suspicionem; posthac opinor esse satius,
illum suo ingenio relinquere. Aut me
fallunt omnia, aut sub illa persona pro-
bitatis latet animus insigniter ἀλαζών. Misi ad
illum etiam tuam schedam, in qua nota-
ras quaedam ad prouerbia facientia. Eam
ab illo repetes; perinde scribit, quasi sine
alienis praesidiis non possem opus meum
absolvere. Bene vale, Bonifaci charissime.
Prid. Andreae. 1532.

Agnoscis tuum.

Epist. LXXVI.

S. p. Improbis iuxta prouerbum prae-
ter occasionem nihil deest. Tibi ad be-
nefaciendum omnis arripitur occasio. Ani-
mus tuus iam olim perspectissimus erat,
et cum strenula et sine strenula. Res
nulla egebat celeritate. Poteras Hierony-
mo committere. Puero qui attulit, dedi
tres Batzones. Hospiti Anselmi precor
omnia laeta. Bene vale. 27. die Decemb.
1532.

Epist. LXXVII.

S. Quum totam hyemem sat commode valuisssem, Martius misit prodromos suos, et immisit in pedem sinistrum cruciatum adeo perpetuum et crudelem, vt per eum nec dormire nec edere liceat. Expertus eram hoc malum semel atque iterum, sed post triduum abibat, nec vltra pedem proferebatur. Nunc totam tibiam in feruore occupauit. Accersiui medicum, sed his diebus numquam fuit domi.

Viglius scripsit mihi nonnihil de Cicerone; nec dubito quin idem scripserit tibi. Nihil illo iuvene candidius.

Anselmus multa scribit, quum nesciat quid sit scribere. Appellat te fratrem, homo paedagogus, perinde quasi esset Episcopus aut Cardinalis. Omnes epistolas suas explet promissis, quasi ego hic sedeam expectans polonica xenia. Datorum commemoratio, exprobrandi genus est: At toties polliceri, est nondum

data exprobrare. Verum haec aliàs. Bene
vale. Prid. Cal. Martias. 1533.

Erasmus Rot.

Epist. LXXVIII.

S. Mea facilitate numquam es abusus.
Sed tua bonitate quidam abuti conantur.

Illud risi, quod Heruagio de Oratore
respondisti. Protinus enim venit in men-
tem Terentianum illud: Non istas quod
sciam. Poteras simpliciter dicere: Nihil
est missum utcumque promissum est.

Si Lusitanus tibi fuit molestus, doleo.
Id ne esset, nolui hominem commendare.
Quamquam videtur vir bonus nec illi-
beralis.

De indomito illo audies prolixam fabu-
lam, sed coram, quod utinam breui tuo
fiat commodo. Interim quod scripsi, ma-
neat in sinu. Cum nullo ingenio minus
cupiam conflictari, quam cum illo, in quo
prorsus οὐδὲν ὑγιές.

Theologus quidam e grege Nauarrae
profitetur frequenti auditorio Epistolas
Pauli, subinde me perstringens, ex in-
doctis et rixosis collationibus Titelmanni
Franciscani, cui pridem respondi breui li-
bello, qui Antwerpiae excusus est. Eum
si potes isthic nancisci, rogo vt ad me
mittas. Nam ipse nullum inuenio. Bene
vale. Friburgi. 5. die Maii. 1533.

Erasmus Rot.

Epist. LXXIX.

S. p. Numquam fui afflictior, quam
hac aestate. Magna mali causa est coe-
lum hoc sine fine maleficum, per quod
in hac vrbe aegrotant plurimi; sed praeci-
pua causa mihi est inopia vini, quale
haectenus habui. Belnense, quod postre-
mo misit Hieronymus, nonnihil cohibuit
stomachi nauseam, sed est arte confectum.
Nactus eram comites, quibus amiciores
aut candidiores conuictores ne optare qui-
dem poteram. Coactus sum illos dimit-
tere, quod stomachus ad vomitum pronus

nulla ferret colloquia. Duo Doctores,
 quos Alciatus mihi litteris amantissime
 scriptis commendarat, salutarunt me lecto
 affixum, sic affectum, ut Epistolas Alciati,
 tuam, et Grynaei legere non potuerim.
 Postridie redierunt dicturi vale. At ne id
 quidem licuit per valetudinem. Atque
 hoc nomine magis indignor huic valetu-
 dini, quod me non tantum afflictum red-
 dit, verum etiam inhumanum. Eodem
 die superuenit Petrus a Montfort, iuue-
 nis ille prodigiosae proceritatis, Hollan-
 dus, quem arbitror te vidisse Basileae
 apud me. Is pertulit honorarium munus,
 quod patria mea iampridem mihi destina-
 rat, qui si me statuisset occidere, non
 poterat magis in tempore venire. Flagi-
 tabat de re magna commendatitias ad Cae-
 sarem, ad notos et ignotos. Atque hac
 gratia mansit sex totos dies. Cum hoc
 dum conor interdum colloqui et conui-
 uari, subinde morbum renouo. Nunc
 rebus omnibus omissis, do operam, ut
 me seruem meliori tempori. Decreueram
 experiri, an equitatiuncula possem excutere

stomachi fastidium, sed hoc coelum non inuitat, et dolor pedis identidem recrudescens prohibet. Rex Ferdinandus, praeter humanissimas litteras, misit mihi ducentos florenos aureos, et pro Glareano, quem commendaram, quinquaginta. De tumultu, qui fuit Augustae in die ascensionis, puto te iam audisse. Occasio fuit imago Christi, quae sub testudine templi pensilis solet adorari. Eam ante festum clam sustulerant atque perdiderant Zuingliani. Id odorata pars diuersa, clam curauit fieri nouam. Hoc rursus odorati Zuingliani, valide obturant foramen testudinis, per quod imago solet dimitti. Diuersa pars clam vi foramen aperuit, et imaginem nouam suspendit. Hinc mox atrox seditio, ut mirum sit, non in eo tumultu plures homines fuisse necatos. Zuingliani, conscensa templi testudine, imaginem deiecerunt. Tandem et magistratus, missis satellitibus, excluso populo, clausit templum. Quidam templi procurator fuit autor tollendae imaginis, reponendae fuit antesignanus Antonius Fug-

gerus, qui nunc est reus excitatae feditio-
nis. Hac in parte desidero in Antonio
prudentiam. Cedendum erat illi procellae.
Nec tanti erat illud simulacrum. Haud
scio, an Mariangelus Antonium ad hoc
facinus armarit.

Nunc intellige, cur Luscinus meam re-
dierit in gratiam. Resignauit cuidam prae-
bendam, hac lege, vt Fuggerus quotannis
numeraret ipsi 80. florenos aureos, donec
procurasset sacerdotium eiusdem census
aut maioris. Verum vbi Fuggerus ex
Cholero cognouisset, hunc mihi esse ini-
micum, videbatur contracturus benigni-
tatem suam, certe eum scrupulum illi in-
iecerat Cholerus. Hoc metuens Lusci-
nius, finxit reditum in gratiam. Mira-
bar subitam mutationem. Sed sub festum
ascensionis Luscinus per litteras magna
instantia petiit a me, vt mea illa eloquen-
tia se Antonio Fuggero commendarem.
Se non esse nunc alium, quam fuit olim,
quum Fuggerus ipsum sua benignitate
dignum iudicaret. Hoc sane verum dixit,

nisi quod addendum erat: errans iudicaret. Quid facerem? Negarem officium reconciliato? Scripsi, sed colore rhetorico. Ille iactavit nostram amicitiam, multa amanter de me praedicavit, se purgavit, addebat, Erasmus optime valere. Quid multis? Impetravit quod voluit. Numquam tamen me inuisit; per litteras et famulum agit, si quid vult. Pelargus nec visit, nec scribit, ut intelligas rem de composito geri.

Venditur isthic commentarius novus Philippi Melanchthonis in Epistolam ad Romanos, in quo sibi placet, et multa praeclare dicta fateor, sed in multis displicet. Torquet multa, arroganter reiicit Origenem et Augustinum; non pauca transilit. Legi quaterniones aliquot. Videtur fuisse nactus opus aliquod Theologi scholastici, cuius argumentum. Parum emitur. Non esset ingratum, si mitteres Sadoletto, sed admonito, ut aurum legat e stercore.

Si Hieronymus esset aditurus nundinas Argentinenses, committerem illi, ut acci-

peret pecuniam illic a menfariis, quam Rex donauit.

Hic nulla sunt amygdala nisi minuta, immatura et putria; gratum fuerit, si Hieronymus mitteret huc aliquot libras. Hanc Epistolam, si videtur, poteris illi communicare. Bene vale, amice incomparabilis. Friburgi. festo corporis dominici. An. 1533.

Erasmus Rot. tuus omni iure.

Epist. LXXX.

S. Sum animi prorsus ancipitis. Caesar, Regina, totaque aula reuocat me in Brabantiam, misso etiam viatico. Si e Neapoli mitteres bigam tectam, mox aduolare, experturus, an corpus ferat coeli mutationem. De pretio ne labores; habeo plus satis pecuniarum. Velim id quamprimum fieri, nec id sumtu tuo. Nimis impudenter vtor tua bonitate. Tu tamen equo praecede, nunciaturus bigam venturam, vt paremus lagenam vini Bur-

gundiaci. Aut si non est commodum, fac sciam. Tempus vrget. Hodie dimisi, qui petit Sadoletum. Videtur bonus, vel hoc argumento, quod recusauit pecuniam. Vale. postrid. Iacob. 1533.

Erasmus. a coena.

Epist. LXXXI.

S. De miserrima hae valetudine nihil certi possum polliceri. Noctu ortus Boreas me subito in magnum coniecit malum. Si poteris pacisci de naui bene tecta quindecim florenis, quodsi ego ante duodecimum diem Septembris cogerer mutare sententiam, nautae gratis acciperent tertiam naui partem, et locarent nauem suam, cui vellent. Bene vale.

Erasmus tuus infelix.

Dominica die post assumtae virginis.
1533.



Epist.

Epist. LXXXII.

S. Reditum in Brabantiam distulimus in proximum ver. Ita tulit necessitas, & ut arbitror expedit. Nam mutato vino, stomachus coepit reuiuiscere, haecenus pro vino bibi venenum. Liuinus meus, qui nihil umquam gessit ex animi mei sententia, adduxit mihi ab Episcopo duos equos, e quibus alterum eligerem. Iam accincto ad reditum nuntio mane, dixit grandaeuum claudicare. Dimisso nuntio, claudicauit et alter, qui mihi nunc est oneri. Utinam Deus liberet me ab illo nugone!

De testamento quo magis studui me explicare, hoc magis inuoluor. Efficiam tamen, ne omnia veniant in manus praedonum, si quid mihi acciderit. Qua de re scribam tibi, si Gilbertum meum isthuc misero, quod nondum statui.

Sadoletus misit ad me proprium nuntium cum libro, quem vult a me castigari. Perlegi, et feci quod voluit. Eundem cupit et abs te legi. Poteris degu-

stare et probare. Epistola illius ad te fuit inclusa. Nuntius putavit te hic vivere. Idem suspicari videtur Sadoletus. Male audit Basilea. Significaui tamen illi, te isthic necessariis compedibus detineri, purum tamen ab omni sectarum contagio. Hoc enim de te mihi persuadeo.

Miror nihil mitti e Basilea. Si libellus de Concordia ecclesiae excusus est, mitte Sadoleto; si prope absolutus est, mitte quod est excusum.

Si velis nuntium isthic retinere vnum atque alterum diem, hoc per Sadoletum licet, donec scribas et librum degustes.

Iussi vt hic nuncius iret per Nouumburgum, si forte illic esses, ne frustra sit.

Mitto ad te Epitaphium Thomae Mori, quod affixit suo sepulcro. Editurus eram cum aliquot epistolis, sed Emmeus dedit verba. Id si voles describes tibi, meum exemplar mittes Sadoleto. Id enim me mini in litteris.

Lugduni Hilarius Bertulphus peste funditus periit, hoc est ipse cum vxore ac tribus liberis. Cetera scribam per Gilbertum meum, aut reseruabo in colloquium. Cura vt recte valeas. Prid. Cal. Sept. 1533.

Erasmus Rot. tuus.

Epist. LXXXIII.

S. Si Morellus ille est, qui mihi commendatus a Sadoletto vixit apud Hieronymum, oculis paetis, talibus mihi non est opus. Optarim aliquem germanice peritum et vtcumque latine, qui posset Gilberto succedere, modo ne sit huius regionis. Gustasse semel fat est. Dabitur mensis experimento; si alterutri non placet, dabitur viaticum redituro. Caetera coram, vt polliceris. Vale cum omnibus tibi charis. 19. die Octobr. 1533.

Erasmus Rot. tuus.



Epist. LXXXIV.

S. Si hic Viglius offenderit te Basileae, rogo vt candorem ingenii tui, quem in omnes bonos ac doctos expromere soles, in hunc conduplices, quo nihil inueniri potest candidius. Plura non addam, ne mihi pereat hoc operae. Expectamus te ipsum. Bene vale. Basilio S. plurimam. Friburgi. 6. die Nouembr. 1533.

Erasmus Rot. tuus.

Epist. LXXXV.

S. p. Si Bonifacius recte valet, non est quod amplius ab eo requiram. Negotium hoc, in quo diu sategimus, tandem peregimus, nec est quod pedem mea caussa moueas.

Scripseras nescio quid de conditione delata, quid sit hoc, nondum intelligo.

Cupio scire, catulum an catellam tibi pepererit tua Iuno. Bene vale, amico-

rum intime, Friburgi. Natali S. Andreae.
1533.

Erasmus Rot.

Epist. LXXXVI.

S. p. Gaude, sed in sinu, ne Nemesis exaudiat. Infantulum committe Deo et matri. Raro viuunt pueri, qui tenere amantur a parentibus; et apud nos vulgo matrum persuasum est, intentos patris in infantes oculos, effascinationis habere vim. Expectabimus te in feriis, vtinam cum Viglio.

De Alciato valde gaudeo. Ego in his nebulis vix vitam tueor. Vale cum tibi charissimis. 10. die Decembr. 1533.

Erasmus Rot. tuus.

Epist. LXXXVII.

S. De valetudine viderit Dominus. De offensione, omitte quaeso ἀνεμώλια. Citius ipse mihi diffiderem quam tibi. Sunt quae

in tuum aduentum differo. Cruciatus ab-
sunt, stomachus languet. Hoc nouum
non est. Damianus isthic adest. Caetera
coram. Vale, mox a prandio. XI. April.
An. 1534.

Erasmus vere tuus.

Signum epistolae tuae erat mixtum ex
cera rubra et viridi. Hoc an abs te factum
sit, scire cupio.

Epist. LXXXVIII.

S. p. Misere metuo, ne mea simplici-
tas in admonendo alienarit animum Sado-
leti. Rogo vt cures meam epistolam ad
illum perferendam. Opinor Episcopium
proficisci Lugdunum, inde per Gryphum
transmitti poterit. Vale. Reliqua coram.
Natali Marci. 1534.

Agnoscis tuum.

Epist. LXXXIX.

Quamquam non sum κρόνος, tamen hoc
quoque saxum possem concoquere, nisi

monstrum illud hic reliquisset oua viperi-
na, breui ad veterem tragoediam reditu-
rum. Quid autem facias illi, cui neque
pudor est, nec humanitas, nec iudicium,
breuiter, nihil hominis. Iam infecerat
domum meam, antequam quidquam de
eo suspicarer. Idem propemodum mihi
vsu venit in Carino. Erat ὁμοτράπεζος, pu-
tabam amicum, et alebam virulentissimum
obtrectatorem. Id postea cognoui ex Ta-
lesio famulo, licet fero, vt fere pater fa-
miliæ dedecus domus resciscit vltimus.

Vtinam hoc optimo seni persuaderi
possit, vt quod superest ætatis, tranquille
degat! ad eam rem adhibendus esset Prior
Cartusianus.

Non placet, quod decrescit salarii mo-
dus. Videntur enim frigere. Prius am-
pliores spem ostendebant. Praeter peri-
culum mutati coeli, magnis impendiis con-
stabit migratio. Noua domus &c. Sed
tua Pallas tibi suggeret optimum consilium.
Vale. Friburgi. 14. die Iunii. 1534.

Erasmus Rot. tuus.

Epist. XC.

Pro curata epistola habeo gratiam. Dies iam aliquot valeo commodius, sed alor in nouos cruciatus. Propemodum ausurus eram me itineri committere, nisi Bellona nihil vsquam pateretur esse tutum. Quod si Carolus et Ferdinandus expedient vires suas, multo peius erit mihi meique similibus. Me sic tractatum ab illo monstro, de quo tibi narraui coram, vix possum concoquere. Et indies vincit se ipsum. Suspikor illum subornatum ab haereticis, vt se insinuaret in domesticam familiaritatem, quo rimaretur omnia arcana, quibus armatus me perderet. Perueni ad annum septuagesimum; talis contumelia numquam mihi accidit antehac, neque vquam vsu venit, vt cum tali monstro conflictarer. Opus est illi exorcista.

Si is essem qui tu, suaderem focero,
ut si haberet in animo uxorem ducere,
hanc duceret, unde suscepit filium, mo-
deratis sponsaliorum conditionibus. Sin-
minus, ob prolem hanc non duceret, sed

a negotio sese explicaret. Bene vale. Basilio Medico S. p. Tibi charissimis ceteris precor omnia prospera. Friburgi. Festo corporis dominici. 1534.

Erasmus Rot. tuus quantus est.

Epist. XCI.

S. Parum laeta, sed tamen grata nuncias. Auebam scire, quid meo Clantho accidisset, de quo nihil boni mihi praefagiit animus, quod me insalutato hinc discessit, ne pilo quidem hic relicto, quasi numquam huc rediturus. De epistolis ad Sadoletum et Alciatum bene curatis habeo gratiam. Tametsi plane suspicor Sadoletum a nobis alienatum officio, quo debebat nobis reddi amicior. Quereres quod non respondeam litteris tuis. Quis ad istiusmodi nugas respondeat? Agis gratias pro communicato vnius noctis hospitio, pro nescio quibus magnis meis in te meritis. Aliud argumentum inueni, si expectas responsum. Vale cum omnibus tibi charis. 28. die Nouembr. 1534.

Erasmus Rot. tuus.

Epist. XCII.

S. p. Vnde tu cognoris prosperam valetudinem meam, nescio. Mihi certe nondum liquet, vtrum inter viuos, an inter mortuos sim numerandus. Adeo Martius me attentat, et omnes corpusculi sinus lustrat. Instat interlunium; dein infamis illa cauda Martii, quam vereor, ne in medium Aprilis porrigat. De me viderit Deus, tibi res esse ex sententia, gaudeo.

Oro, vt, si qua poteris occasione, litteras meas ad Sadoletum perferendas cures, simulque adiungas Symbolum meum, octo homilias a me versas, ac totidem a Brixiano. Si non continget, qui volet librorum sarcinam suscipere, mitte nudam Epistolam, quae libellos promittit sub conditione, si contingat, qui non recuset sarcinulas.

Heruagio excusavi me, sed blande. Ita certum est posthac facere omnibus, *ἀλλήως* *ἄλλως*. Gratulor inclytae Academiae vestrae accessione noui Doctoris Brunsfeldii feliciter auctae. Sed audi quod rideas.

Fasciculo cuidam Epistolarum ad me admixta erat Epistola duplici cera obsignata. Videbatur alia esse intus. Titulus erat ambitiosus: Inclyto Viro, sed re maiori, Simoni Grynaeo, Platonicae et Aristotelicae Philosophiae Professori &c. Manum videbar vidisse, sed non agnoui, eoque minus suspicabar rem, quod adiuncta esset Epistola iis quae missae fuerant ex Italia. Mirabar et illic esse repertos Grynaei admiratores. Misi Grynaeo Epistolam obuolutam tunica mea, in qua scripseram, me meliore fide eam Epistolam ad illum mittere, quam Evangelici quidam tractarent meas litteras. Ille continuo putans se petitum, cum stomacho respondit, se optare, ut si quid vellem expostulare, simpliciter aperirem, quid me offenderet; et forex suo se prodens indicio, narrat, inclusam fuisse Epistolam ad me, Carini, sed per illum sibi liberum fuisse factum, utrum putaret igni tradendam, an mihi reddendam; se vero tradidisse igni, quod exordium esset blandum, sed in medio pus veteris maleuo-

lentiae. Vide ingenium illud impotens ,
nulla vindicta fatiabile. Cetera coram ,
vt spero in Aprili. Opto te quam optime
valere. Friburgi. XI. Cal. April. 1535.

Litterae hospitis Anselmi , quas miserat
Iacobo quondam meo κλέπτῃ , diutius apud
me haeserunt, quod nullus obtingeret ,
cui committerem.

Erasmus Rot. tuus.

Sed pridem per certum hominem misi
ad Ioannem Paumgartnerum. Is omnia
curabit diligentissime. Quod illi significes
oro, quum erit commodum, addasque
meo nomine salutem.

Heruagius nihil agit. Appellor ab Epif-
copis de ratione concionandi, deque aliis.
Vix tueor valetudinem, et tot iam annis
nullas mihi ferias dedi. Subornant te pa-
tronum, cui vni sciunt me nihil posse
negare. Sic Obperus per te extorsit litte-
ras in Angliam. At is resedit Antwerpiae
supra mensem, diutius mansurus, si in-

uenisset fatuos. In Anglia decepit eos, quibus fuerat commendatus. Permittam tibi pro Heruagio rogare, modo mihi condones, quod illi pernego. Praefari in tam nobilem autorem, in quo non fecerim operae pretium, mihi turpe fuerit et inuidiosum, iustam autem curam impendere, etiamsi maxime cupiam, non possim. Rursum vale.

Decimo die Aprilis.

Epist. XCIII.

Exemplar Epistolae D. Erasmi ad Iac. Sadoletum pro Dno Bonifacio Amerbach.

S. P. Tam diutinum silentium tuum varie sollicitauit animum meum: Primum subuerebar, ne in conuentu Massiliensi nonnihil aduersae valetudinis contraxisses, homo vt audio parcissimi victus, alioqui et ad senium vergente corpore. Pulsabat interdum animum meum nonnullus metus, ne qua occasione vetus illa tua in me beneuolentia refrixisset. Tametsi

suspicionem hanc vt ipse grauatim admittebam, ita Bonifacius constanter negabat eam haerere in virum incredibili candore singularique constantia. Excutebam tamen me ipsum, si fors imprudens commeruissem, vt alius in me esses, quam antea fueras. Videbam quam esset impudens, ab Erasmo admoneri Sadoletum, hoc est, a sue, quod aiunt, Mineruam. Verum ad hoc audaciae tua me perpulit autoritas, vt etiamsi parum dextre fuisssem meo functus officio, tamen aequum erat probare obsequium, et in meo errato tibi ipsi ignoscere. Admonui pro meo ingenio simpliciter, nec, vt opinor, procaciter, qui totius iudicii mei te rursus iudicem fecerim. Ad haec, etiam si quid ibi familiarius dictum fuit, aut excidit potius, quam decuit, quoniam praeter te et me nullus mortalium schedas eas vidit, ne Bonifacius quidem, sperabam, tuam aequitatem perinde habituram, ac si nihil scriptum fuisset. Qua quidem in spe sum et hodie. Miseram Commentarios Melanchthonis, non vt illos imi-

tareris. Nec enim alibi magis torquet scripturam, utcunque miram professus simplicitatem; sed quum illic commemorantur variae multorum opiniones, sciebam tuam prudentiam illinc excerpturam, quod ad mentis Paulinae faceret cognitionem. Sapiens enim qualicumque data occasione fit sapientior, ut habent hebraeorum prouerbia. Interdum veniebat in mentem, quantum valeant malae linguae, quibus hoc saeculo videmus prodigiosam esse licentiam. Huiusmodi cogitationibus me torfit haecenus litterarum tuarum intermissio. Ea molestia si me leuare dignaberis, rem feceris ut tua dignam humanitate, et mihi summopere gratam. Bene vale. Apud Friburgum Brisgoiae. pridie Cal. Nouembris. M. D. XXXIIII.

Eras. Rot.

S. P. Dominus meus mihi mandauit, ut has tres epistolas ad te mitterem, ut tu eas, ubi primum dabitur certus nuntius ad illos, quibus inscriptae sunt, transmittas. Nouarum n. rerum quod nunc

ad te scriberem, nil habui aliud, quam quod Cardinalis Farnesius, cui nomen Paulo Tertio, XII. Octobris Romae in summum Pontificem est electus. Dicitur esse nobilis, doctus et doctorum hominum amans, moribus sobriis ac philosophicis. Italus est, et scribunt eum Gallis fauere. Porro Aleisius Gritti, qui Turcae nomine pacis feriendae gratia in Vngariam venerat, scribitur a Zeckleris atque Vngaris captus et decollatus esse. Quid autem ob id Turca contra Christianos moliturus sit, Deus nouit. Bene vale. Datum plus quam ex tempore, quarto die Nouembr. 1534.

Tibi totus deuotus
Gilbertus Cognatus.

D. Erasmo per Chiragram non licuit scribere.

Epist. XCIV.

Iacobus Sadoletus omni doctrina ac pietate ornatissimo Viro D. Erasmo Rot.

Accepi tuas litteras IIII. Nouembris datas,
quae

quae me maximo dolore affecissent propter tuam de mea erga te mutata voluntate suspicionem, nisi diuino quodam beneficio mihi contigisset, ut paucis ego horis litteras ad te antea dedissem plenas verissimi amoris, ut conscius mihi sum, neque tamen tanti, quantus meus erga te in omnibus meis sensibus inclusus est atque inhaeret: Tu vero ut metueres, ne illo officio scripta mea corrigendi me laesisses, in quo tibi a me par ne haberi quidem potest gratia? Noli obsecro, mi Erasme, me ex eo genere hominum ducere, qui se castigari et admoneri aegre ferant: Nul- lum est obsequium, quod mihi praestari possit gratius. Utinam vero tu semper mihi praesens et corrector adesses et ma- gister. Nulla est felicitas tanta, quam huic anteponerem. Quodsi illa sanctitas amicitiae, quae inter probos maxime vi- get, nostros utriusque animos fideli vin- culo astrinxit, ne umquam desiste quaeso me et monere et reprehendere, ubi vi- deris esse opus, quod si viueremus vna, crebrius usu veniret ut esset faciendum,


H

quam tu fortasse arbitrareris. Sed tamen ut etiam absens id efficias, habes commentarios meos in vulgus nunc editos, qui tuum acre iudicium expectant, non cum timore, sed cum spe, melius euenturum et sibi et mihi, siquidem quod in his recte reprehensum fuerit, alibi integrius et incorruptius reponetur. Ego quod tamdiu ad te litteras nullas dederam, factum erat occupationibus meis et nouitatibus horum temporum, quae inexpectatae et variae nos quoque ipsos nonnihil attigerant; Deinde etiam eo, quod te in Belgas tuos non equidem certum habebam, sed tamen verabar profectum esse. Recordabar enim, te ad me scripsisse, profectionem illam a te in proximum ver differri, quod tempus iam nouem fere mensibus transactum est. Sed siue ego scribam, siue non scribam, illud tibi volo esse persuasissimum, cum plurimos tui obseruantes, curiosos, amantesque habeas, nemini omnino eorum me cedere, potiusque affirmare audere, nulli tam charam esse salutem et existimationem tuam, quam ea est mihi. Quodque

aliàs tibi indicasse me memini, me, etsi
 viuam tenuibus fortunis, tum cupere te
 mecum omnium meorum esse participem,
 id et nunc renouo dictum, et pro iure
 amicitiae nostrae te obtestor, vt nihil
 meum esse statuas, quod non eodem modo
 tuum sit, et si quid adiici potest etiam
 efficacius et peculiarius tuum: Quod si
 experiri opera institueris, maxime tuum
 amorem in ea re mihi ostendes. Amer-
 bachium nostrum cupio valere, cui tu
 plurimam meis verbis mittes salutem. Vale,
 mi doctissime et optime Erasme, et de
 tuo confirmato in recta opinione de me
 animo primo quoque tempore me certio-
 rem fac, vt quam ex tuis litteris mole-
 stiam accepi, eam quamprimum ex meo
 animo excutiam. Iterum vale. v. Idus
 Decembris. MDXXXIIII. Carpentoracti.

Tui amantissimus Iacobus Sadoletus,
 Carpent.





III.

LEO. P P. X.

Dilecte fili salutem et apostolicam benedictionem. Vite ac morum honestas, aliaque laudabilia probitatis et virtutum merita, super quibus apud nos fidedigno commendaris testimonio nos inducunt, ut te specialibus fauoribus et gratiis prosequamur. Hinc est quod nos volentes te, pro quo charissimus in Christo filius noster Henricus VIII. Angliae rex illustris tanquam sibi grato et accepto humiliter supplicauit, fauore prosequi gratiofo; ac a quibuscumque excommunicationis, suspensionis, et interdicti, aliisque ecclesiasticis sententiis, censuris et poenis a iure vel ab homine quauis occasione vel causa latis, si quibus quomodolibet innodatus existis, ad effectum praesentium duntaxat consequendum, harum serie absoluentes, et absolutum fore censentes; tecum, ut

quecunque, quotcunque, et qualiacunque cum cura et sine cura beneficia ecclesiastica aut si duae parrochiales ecclesiae, vel earum perpetuae vicariae, cantorie, libere capellae, hospitalia, vel annalia seruitia clericis secularibus in titulum perpetui beneficii ecclesiastici assignari solita, aut dignitates, personatus, administrationes, vel officia in cathedralibus aut metropolitaneis vel collegiatis ecclesiis aut maiores et principales ac curata et electiua fuerint, si tibi alias canonice conferantur, aut eligaris, presenteris, vel alias assumaris ad illa, et instituaris in eis, recipere, et incompatibilia insimul quoad vixeris, retinere, illaque simul vel successiue, simpliciter, vel ex causa permutationis quotiens tibi placuerit, dimittere, et loco dimissi vel dimissorum, aliud vel alia simile vel dissimile, aut similia vel dissimilia, beneficium seu beneficia, ecclesiasticum vel ecclesiastica, quecunque quotcunque et qualiacunque fuerint, usque ad summam mille ducatorum auri de Camera, dummodo inter incompatibilia ultra

quam duae parrochiales ecclesiae vel earum perpetuae vicariae non existant, similiter recipere, et insimul quoad vixeris, retinere, libere et licite valeas; Generalis Concilii, nec non quibuscumque aliis apostolicis, ac bonae memoriae Otthonis et Otthoboni olim in regno Angliae apostolicae sedis Legatorum, ac in provincialibus et sinodalibus Conciliis editis generalibus vel specialibus Constitutionibus et ordinationibus, statutis quoque et consuetudinibus ecclesiarum, in quibus incompatibilia beneficia huiusmodi forsan fuerint, iuramento confirmatione apostolica vel quavis firmitate alia roboratis, caeterisque contrariis nequaquam obstantibus, auctoritate apostolica, tenore praesentium de specialis dono gratiae dispensamus: Prouiso quod incompatibilia beneficia huiusmodi debitis propterea non fraudentur obsequiis, et animarum cura in eis, si qua illis immineat, nullatenus negligatur. Datum Romae apud Sanctum Petrum sub annulo pisca-

toris die. XXVI. Ianuarii. MDXVII. Pontificatus nostri anno quarto.

Inscriptio litterarum :

Dilecto filio Erasmo Rogerii Roterodamen.
Clerico Traiecten. diocesis.

Ia. Sadoletus.

IV.

PAVLVS. P P. III.

Charissima in Christo filia nostra, salutem et apostolicam benedictionem : Contulimus nuper dilecto filio Desiderio Erasmo Roterodamo ob eius celebrem doctrinam et singulares virtutes Preposituram Dauantriensem tunc per obitum quondam Ioannis Ingenwinkel, apud sedem apostolicam defuncti vacantem et in tuae Maiestatis Gubernio existentem, non solum iure nostro quod in hoc perspicuum est videntes, verum et spe firma ducti tuam Serenitatem hanc nostram gratiam in talem

virum a quo ista Natio Germanica tantum recipit ornamentum collatam suo fauore profecuturam et gratam habituram. Proinde hortamur Maiestatem tuam in Domino et studiose requirimus, vt pro tua erga hanc sanctam sedem filiali obseruantia, et regia in viros benemeritos benignitate dictae Praepositurae possessionem vacuam ab intrusis pro dicto Erasmo conseruari, eique cum literas nostras sub plumbo praesentari fecerit aut procuratori eius consignari facere velis. Quod et si ex vacatione apud sedem et obitum familiaris nostri ipso iure est debitum, tamen ob desyderium quo ipsi Erasmo benefacere et gratificari tenemur, erit nobis a tua Serenitate admodum gratum et acceptum. Datum Romae apud Sanctum Marcum sub annulo piscatoris, die v. Augusti M. D. XXXV. Pontificatus nostri anno primo.

Blosius.

Inscriptio epistolae:

Charissimae in Christo filiae nostrae
Mariae viduae reginae Vngariae Flandriae
gubernatrici.

V.

TESTAMENTVM

D. ERASMI ROT.

ex autographo eius in Bibliotheca publica
academiae Basil. seruatō transcriptum.

In nomine Sanctae Trinitatis.

Desiderius Erasmus Roterodamus, fretus Diplomatribus Caesaris, summi Pontificis, ac magnifici Magistratus inclytae ciuitatis Basiliensis, hoc meo Chirographo renouo supremam voluntatem meam, quam quocunque titulo firmam ac ratam haberi volo, irritum vero si quid aliās testatus sum.

Principio certus me nullum habere Legitimum haeredem, praestantissimum Virum D. Bonifacium Amerbachium, omnium facultatum mearum haeredem instituo, exequutores vero Hieronymum Frobenium et Nicolaum Episcopium.

H 5

Bibliothecam meam iam pridem vendidi D. Ioanni a Lasko polono iuxta syngrapham super hoc contractu inter nos confectam. Non tradentur libri, nisi haeredi numeret ducentos florenos. Quod si ille pactum remiserit, aut me prior e vita excesserit, liberum esto haeredi de libris statuere, quod velit.

D. Lodouico Bero, lego horologium aureum. Beato Renano cochleare aureum cum fuscinula aurea. M. Petro Veterio centum quinquaginta coronatos aureos. Tantumdem Philippo Montano. Lamberto Famulo, si mihi morienti adfuerit, ducentos florenos aureos, nisi ego viuis ei hanc summam numeraro. D. Ioanni Brisgoo lagenam argenteam. D. Paulo Voltzio florenos aureos centum. Sigismundo Gelenio ducatos centum et quinquaginta. Ioanni Erasmo Frobenio duos annulos, quorum alter non habet gemmam, alter gemmam subuiridem, Gallis dictam Turcois. Hieronymo Frobenio lego omnes vestes meas omnemque supellectilem

laneam, lineam et ligneam, praeterea poculum, quod habet insignia Cardinalis Mogontini. Vxori eius annulum, qui habet imaginem mulieris in tergum respicientis. Nicolao Episcopo poculum cum operculo, quod in pede habet versiculos insculptos. Iustinae vxori eius duos annulos, quorum alter habet adamantem, alter Turcois minorem. M. Conrado Goclenio poculum argenteum, quod in summo habet imaginem fortunae. Si quis legatariorum interciderit, quod legatum erat, in haeredis arbitrio esto.

Haeres praeter ea, quae ipsi per Syngrapham designaui, sibi accipiet, quicquid superfuerit poculorum, aut annulorum, aut rerum similium, adhaec nomismata insignia, vt lusitanos cruciatus, Regis poloniae ac Seuerini Boneri faciem exprimentia, aliaque his similia. Praeterea ducatos omnes duplices et quadruplices. Pecuniam apud Conradum Goclenium depositam, illi in Brabantia dispensandam relinquet, quemadmodum ei mandaui. Si

quid apud Erasmus Schetum erit reliquum, ab eo repetet. Eamque pecuniam ac reliquam omnem, quae superfuerit, suo arbitrio et ex consilio exequutorum distribuet in usus pauperum, aetate aut valetudine infirmorum. Item in puellas nupturas, in adolescentes bonae spei, breuiter, quoscumque subsidio dignos iudicarint.

Hanc extremam voluntatem meam, quo plenior sit fides, propria manu descripsi, ac peculiare annuli mei sigillum Terminum affixi Basileae in aedibus Hieronymi Frobenii duodecimo die Februarii anno a natali dominico Millesimo quingentesimo tricesimo sexto.

(L. S.)

Testimonium Notarii publici de authentia
Testamenti Erasmi Roterodami.

Anno a Christo nato Millesimo, quingentesimo, trigesimo sexto, indictione nona, die decima quarta Februarii, hora quasi tertia pomeridiana, in aedibus honesti

et circumspecti Domini Ieronymi Frobenii
 Typographi et ciuis Basiliensis, inque su-
 periori aula eiusdem domus, constitutus
 coram me Notario publico et fide dignis
 testibus subscriptis, Clarissimus et omnium
 eruditissimus vir, Dominus Desiderius
 Erasmus Roterodamus, licet corpore non
 admodum firmo, sanus tamen mente, hanc
 chartam clausam in manu habens, in qua
 dicebat vltimam suam voluntatem sua ma-
 nu conscriptam contineri, quam iure testa-
 menti, vel codicillorum, donacionis causa
 mortis, vel cuiuscunque alterius volunta-
 tis, omni meliori via, modo, et forma,
 quo efficacius posset, valere volebat, hae-
 redem nominans et instituens ornatissimum
 dominum Bonifacium Amerbachium legum
 doctorem, executores vero egregios viros,
 dominum Ieronimum Frobenium, et Ni-
 colaum Episcopium Typographos et ciues
 Basilienses, qui omnes praesentes, munera
 iniuncta, beneuole acceptantes, sese ea
 omnia et singula, in praesenti charta con-
 tenta, bona fide obseruatueros et exequu-
 tueros, sancte promittebant †. Et cum in

praedictorum fidem, meam, tamquam publici Notarii attestacionem et subscriptionem requireret, veritati testimonium perhibiturus, subscripsi. Acta sunt haec Anno Domini, indictione, die, hora, loco, et aliis praescriptis. Regnante inuictissimo Carolo quinto, Romanorum Imperatore semper Augusto &c. Anno Imperii sedecimo. Praesentibus eximiis et eruditis viris, Domino Ieronymo Frobenio, Nicolao Episcopo, Sigismundo Gelenio, et Lamberto Coomanno, testibus ad praemissa specialiter vocatis et rogatis.

Adelberus Salandronius, vulgo Saltzmann, sacris Apostolica et Imperiali auctoritatibus Notarius iuratus haec audiuit, et suapte manu ffit.

† (a) Praeterea tametsi Iuris communis sit, vt posteriore testamento perfecto priora tollantur, tamen si et in quantum opus est reuocatione, si quae ante a se quomodocunque vel quandocunque conscripta sunt, vigore, non solum iuris communis, sed et diplomatum a Pontifice, Caesare,

ac Magistratu Basiliensi concessorum, sic omnia et singula, vt hac scheda continentur, vel renouata vel mutata volens, et si quae aliter constituiisset, conceptis verbis reuocans. In hac scheda, sua manu scripta et sigillo subsignata, suam vltimam voluntatem contineri dicens, quam in vim vltimae voluntatis qualiscunque, aut si sic subsistere non posset, in vim donacionis etiam inter viuos mediante insinuacione et tradicionem factae, qualitercumque et quomodocumque, omni meliori modo, via, forma, vt supra, valere, et inuiolabiliter obseruari vult, testibus, vt supra, praedictis.

A. Saltzmann, Not.

(a) Quae signo † notata sunt, in exemplo MS. a latere fuere posita.



[The page contains faint, illegible text, likely bleed-through from the reverse side.]


20-21-22-23-24-25-26-27-28-29-30-31-32-33-34-35-36-37-38-39-40-41-42-43-44-45-46-47-48-49-50-51-52-53-54-55-56-57-58-59-60-61-62-63-64-65-66-67-68-69-70-71-72-73-74-75-76-77-78-79-80-81-82-83-84-85-86-87-88-89-90-91-92-93-94-95-96-97-98-99-100-101-102-103-104-105-106-107-108-109-110-111-112-113-114-115-116-117-118-119-120-121-122-123-124-125-126-127-128-129-130-131-132-133-134-135-136-137-138-139-140-141-142-143-144-145-146-147-148-149-150-151-152-153-154-155-156-157-158-159-160-161-162-163-164-165-166-167-168-169-170-171-172-173-174-175-176-177-178-179-180-181-182-183-184-185-186-187-188-189-190-191-192-193-194-195-196-197-198-199-200-201-202-203-204-205-206-207-208-209-210-211-212-213-214-215-216-217-218-219-220-221-222-223-224-225-226-227-228-229-230-231-232-233-234-235-236-237-238-239-240-241-242-243-244-245-246-247-248-249-250-251-252-253-254-255-256-257-258-259-260-261-262-263-264-265-266-267-268-269-270-271-272-273-274-275-276-277-278-279-280-281-282-283-284-285-286-287-288-289-290-291-292-293-294-295-296-297-298-299-300-301-302-303-304-305-306-307-308-309-310-311-312-313-314-315-316-317-318-319-320-321-322-323-324-325-326-327-328-329-330-331-332-333-334-335-336-337-338-339-340-341-342-343-344-345-346-347-348-349-350-351-352-353-354-355-356-357-358-359-360-361-362-363-364-365-366-367-368-369-370-371-372-373-374-375-376-377-378-379-380-381-382-383-384-385-386-387-388-389-390-391-392-393-394-395-396-397-398-399-400-401-402-403-404-405-406-407-408-409-410-411-412-413-414-415-416-417-418-419-420-421-422-423-424-425-426-427-428-429-430-431-432-433-434-435-436-437-438-439-440-441-442-443-444-445-446-447-448-449-450-451-452-453-454-455-456-457-458-459-460-461-462-463-464-465-466-467-468-469-470-471-472-473-474-475-476-477-478-479-480-481-482-483-484-485-486-487-488-489-490-491-492-493-494-495-496-497-498-499-500-501-502-503-504-505-506-507-508-509-510-511-512-513-514-515-516-517-518-519-520-521-522-523-524-525-526-527-528-529-530-531-532-533-534-535-536-537-538-539-540-541-542-543-544-545-546-547-548-549-550-551-552-553-554-555-556-557-558-559-560-561-562-563-564-565-566-567-568-569-570-571-572-573-574-575-576-577-578-579-580-581-582-583-584-585-586-587-588-589-590-591-592-593-594-595-596-597-598-599-600-601-602-603-604-605-606-607-608-609-610-611-612-613-614-615-616-617-618-619-620-621-622-623-624-625-626-627-628-629-630-631-632-633-634-635-636-637-638-639-640-641-642-643-644-645-646-647-648-649-650-651-652-653-654-655-656-657-658-659-660-661-662-663-664-665-666-667-668-669-670-671-672-673-674-675-676-677-678-679-680-681-682-683-684-685-686-687-688-689-690-691-692-693-694-695-696-697-698-699-700-701-702-703-704-705-706-707-708-709-710-711-712-713-714-715-716-717-718-719-720-721-722-723-724-725-726-727-728-729-730-731-732-733-734-735-736-737-738-739-740-741-742-743-744-745-746-747-748-749-750-751-752-753-754-755-756-757-758-759-760-761-762-763-764-765-766-767-768-769-770-771-772-773-774-775-776-777-778-779-780-781-782-783-784-785-786-787-788-789-790-791-792-793-794-795-796-797-798-799-800-801-802-803-804-805-806-807-808-809-810-811-812-813-814-815-816-817-818-819-820-821-822-823-824-825-826-827-828-829-830-831-832-833-834-835-836-837-838-839-840-841-842-843-844-845-846-847-848-849-850-851-852-853-854-855-856-857-858-859-860-861-862-863-864-865-866-867-868-869-870-871-872-873-874-875-876-877-878-879-880-881-882-883-884-885-886-887-888-889-890-891-892-893-894-895-896-897-898-899-900-901-902-903-904-905-906-907-908-909-910-911-912-913-914-915-916-917-918-919-920-921-922-923-924-925-926-927-928-929-930-931-932-933-934-935-936-937-938-939-940-941-942-943-944-945-946-947-948-949-950-951-952-953-954-955-956-957-958-959-960-961-962-963-964-965-966-967-968-969-970-971-972-973-974-975-976-977-978-979-980-981-982-983-984-985-986-987-988-989-990-991-992-993-994-995-996-997-998-999-1000-1001-1002-1003-1004-1005-1006-1007-1008-1009-1010-1011-1012-1013-1014-1015-1016-1017-1018-1019-1020-1021-1022-1023-1024-1025-1026-1027-1028-1029-1030-1031-1032-1033-1034-1035-1036-1037-1038-1039-1040-1041-1042-1043-1044-1045-1046-1047-1048-1049-1050

(a) Que l'homme + l'homme sont en exemple

MS. A. 9. 2. 1. 1. 1. 1.

(a) Free-

79. talen



13

Erasmus, Desiderius,

Epistolae familiares

Basilea 1779

Epist. 257

urn:nbn:de:bvb:12-bsb10402761-1

VD18 10242589-007